

劉賓客文集

冊一

劉賓客文集

四
結
論
賦

劉賓客文集不持論序

四部備要

集部

上海中華書局據劉氏刻

本校刊

桐鄉 陸費逵 總勘

杭縣 高時顯 輯校

杭縣 吳汝霖 校

丁輔之 監造

劉賓客文集卷第一

正議大夫檢校禮部尚書兼太子賓客贈兵部尚書劉 禹錫

賦

問大鈞賦

砥石賦

楚望賦

傷往賦

何卜賦

謫九年賦

望賦

山陽城賦

秋聲賦

問大鈞賦

并序

始余失臺郎爲刺史又貶州司馬俟罪貶州三見閏月人咸謂數之極理當遷焉因作謫九年賦以自廣是歲臘月詔追明年自闕下重領連山郡印綬人咸曰美惡周必復第行無恤歲杪其復乎居三年不得調歲二月有事于社前一日致齋孤居慮靜滯念歛起伊人理之不可以曉也將質諸神乎謹貢誠馳精敢問大鈞其夕有遇寤而次第其詞以爲賦

圓方相函兮浩其無垠窅冥翕闢兮走三辰以騰振孰主張是兮有工其神迎

隨不見兮強名之曰大鈞鼓以臨下兮魏兮雄尊天爲獨陽高不可問工居其中與人差近身執其權心平其運循名想像斯可以訊曰嘻蒙之未生其猶泥耳落乎埏埴唯鈞所指忽然爲人爲幸大矣工賦其形七情與俱嗇智不授畀之以愚坦坦之衢萬人所趨蒙一布武化爲畏途人或譽平之百說徒虛人或排之半言有餘物壯則老乃唯其常否終則傾亦不可長老先期而驟至兮否踰數而叵量雖一夫之不獲兮亦大化之攸病謹薦誠上問兮俛伏以聽是夕寢熟夢遊兮無何有之鄉抗陛級于重霄兮異人闕之景光中有威神兮金甲而煒煌頷之使前兮其音琅琅曰吾大化之一工也居上臨下廉其不平汝今有辭吾一以聽播形肖貌生類積億橐籥圈匡鎔鍊消息我之司智初不爾嗇不守以愚覆爲汝賊旣賦汝形輔之聰明盍求世師資適攸宜胡然抗志遐想前烈倚梯青冥舉足斯跌韜爾智斧無爲自伐鑿竅太繁天和乃洩利逕前誘多逢覆轍名腸內煎外火非熱今哀汝窮將厚汝愚剔去剛健納之柔濡塞前竅之傷痕兮招太和而與居恕以待人兮急以自拘道存邃奧無示四隅軋物

之勢不作兮見傷之機自無汝不善用吾焉嗇乎且夫貞而騰氣者膺膺健而垂精者昊昊我居其中猶輪是蹈以不息爲體以日新爲道俛鱗蜚走灌莽苞阜乃牙乃甲乃殪乃剖陽榮陰悴生濡死藁各乘氣化不以意造賦大運兮無有淑慝彼多方兮自生醜好爾奚不德余以驟壯姑尤我以速老邪觀汝百爲又或不然赤子哇哇急其能言亦旣名物幾時踟躕春耕其丘投種之日釋耒而歎何時實粟望所未至謂余舒舒欲其久留謂我譬如我一子二誰之曲歟彼蒹葭之蒼蒼兮霜霰苦而中堅松竹之皴皴索籜兮不若櫛筍之可憐納材輦而構明堂兮固容消而力完揚且之哲兮不可以常然當錫爾以老成蒼眉皓髯山立時行去敵氣與矜色兮噤危言以端誠俾人望之侮黷不生爾之所得孰與壯多不善處老問余而何受教而回遽遽形開嚮之威神孰爲來哉乃遽衣促盥端慮滌想委佩低簪持簿叩顙而言曰楚臣天問不訓今臣過幸一獻三售始厚以愚終期以壽忘上問之罪濯已然之咎心憎故術腹飽新授馳神清玄拜手稽首

砥石賦

并序

時在朗州

南方氣泄而雨淫地慝而傷物媪神噫溼淪色壞味雖金之堅亦失恆性始余有佩刀甚良至是澀不可拔剖其室乃出遡陽眇眇傳刃蒙脊鱗然如瘡痂如黑子如青蠅之惡銳氣中錮猶人被病然客有聞焉裏密石以遺予沃之草腴雜以烏膏切臠下上真質焯見躊躇四顧道奈周切爾謝客微子之貽幾喪吾寶客曰吾聞諸梅福曰爵祿者天下之砥石也高皇帝所以礪世磨鈍有是耶余退感其言作砥石賦

我有利金兮以利爲佩遭土卑而慝作兮雄銚爲之潛晦如景昏而蝕既兮與肌漆而爲癘顧秋蓬之不可荆兮尙可遊乎臆髀之外利物蒙蔽材人惆悵俾百汰之至精播一檢而多恙豈害氣之獨然兮將久不試而然彼屠者之刃兮獵者之鋌不灌不淬兮揉錯銜鉛日鼓月揮兮剗腴擊鮮晚燿燿以耀芒翦淫夷而騰羶豈不涉暑而蒙沴兮鼎用之而成妍有客自東遺余越砥圭形石質蒼色膩理刻其鱗皴滑以滫臄如衣澣垢如鼎出否霧盡披天萍開見水拭寒

燄以破皆擊清音而振耳故態復還寶心再起旣賦形而終用一蒙垢焉何恥
感利鈍之有時兮寄雄心於瞪視嗟乎石以砥焉化鈍爲利法以砥焉化愚爲
智武王得之商俗以厚高帝得之傑材以湊得旣有自失豈無因漢氏以還三
光景分隨道闊狹用之得人五百餘年唐風始振懸此天砥以礪兆民播生在
天成器在君天爲物天君爲人天安有執礪世之具而患乎無賢歟

楚望賦 并序

予旣謫于武陵其地故郢之裔邑與夜郎諸夷錯雜繫乎天者陰伏陽驕是已
繫乎人者風巫氣竄是已囂霧浮浮利于樓居城之麗譙實鄰所舍四垂無蔽
萬景全入因道其遠邇所得爲楚望賦云

翼軫之野祝融司方陰迫而專專實生沴天濡而冱土洩而泥氣罕淑清兮淫
氛曠曠中人支體兮爲瘡爲瘵以廣滌煩兮利居高于物外我卜我居于城之
隅宛在藩落麗譙渠渠四阿垂空洞戶發樞眸子不運坐陵虛無歲更周流時
極慘舒萬象起滅森來貶予櫺軒之外羣山龍從岡陵靡陀勢若相拱出雲見

怪竊蔚森聳露夕霞朝望如飛動簷廡之下大江頽洞支流合輸泄入雲夢義
和望舒出沒兩涯涵泳之族聳牙歔呀秋水灌盈漩石飄沙流枿軒昂舞于盤
渦逮及收潦澹如醪醞白石磷磷倒影羅生蘋末風起有文無聲悠遠煙絲與
空蒼然湘沅之春先令而行臘月寒盡溫風發榮土膏如濡言鳥嚶嚶三星噤
其晚中植物颯以飄英雲歸高唐草蔽洞庭日與天盡神將化并圓方相涵遊
氣杳冥熙熙藹藹藻飾羣形枿樹童立積空凝青環洲曲塘含景曜明恢台之
氣發于春季涉夏如鑠逮秋愈熾土山焦熬止水瀟沸翔禽跼墮呀咻垂翅曦
赫歔蒸陽極反陰二儀交精下上相歆雲與天際欸若車蓋凝矚未瞬瀾漫灑
鬪驚雷出火喬木糜碎殷地熱空萬夫皆廢懸雷綆維日中見昧移晷而收野
無完塊少陰之中景物澂鮮丹葉星房燭耀川原夕月旣望曜于丹泉上鏡下
冰湔塵濯煙宿麗潛芒獨行高躔皓一氣之悠然潔有形而溢清玄杳微明而
斐疊想遊目於化先夜無朕以徂征金霞暈乎海壖明星方揚斜漢西懸璿柄
如墮半沈層瀾雞啁晰而晨鳴兮日荏苒以騰晶動植瞭兮已分山川鬱乎不

賈來貿發於懷握無翼而飛潤于豐屋晒耕耘之悒悒徒胼胝以自鞠我處層
軒日星回還閱天數而視民風百態變見乎其閒非耳剽以臆說兮固幽永而
縱觀觀物之餘遂觀我生何廣覆與厚載豈有形而無情高莫高兮九闈遠莫
遠兮故園舟有楫兮車有轄江山坐兮不可越吾又安知其所如况臨高以觀
物

傷往賦

并序

人之所以取貴於飛走者情也而誕者以遣情爲智豈至言耶予授室九年而
鰥痛苦人之天闕弗遂也作賦以傷之冀夫覽者有以增伉儷之重云

歎獨處之悒悒兮憤伊人之我遺情可殺而猶毒境當歡而復悲人或朝歎而
暮息夫何越月而逾時太極運乎三辰轉寒暑而下馳有歸於無兮感復于衰
猶味爽之必暮又安得而怨咨我今怨夫若人兮曾旭旦而潛暉飄零日及之
萼日及權也朝生暮落一名王蒸爾雅倏忽蜉蝣之衣川走下而不還露迎暘而易晞恩已甚兮

難絕見無期兮永思我行其野農民桑者舉棧來鱣亦在林下我觀于途裨販

之夫同荷均擊荆釵布襦羽毛之蕃鱗介之微和鳴灌叢雙泳漣漪薨薨伊蟲
蠢蠢伊豸遊空穴深兩兩相比何動類之萬殊必雄雌而與俱物莫失儷以孤
處我方踽踽而焉如我復虛室目淒涼兮心伊鬱心伊鬱兮將語誰坐匡牀兮
撫嬰兒何所勾沐兮何從仰飴襦袴在身兮昔圍差跌鞶囊附臂兮餘馥葳蕤
誠天性之潛感顧童心兮如疑曉然有難繼之慕漠然滅好弄之姿指遺桂兮
能認遡空帷兮欲歸我入寢宮痛人亡兮物改其容寶瑟僵兮弦柱絕瑤臺傾
兮鏡奩空寒鑪委灰虛幌多風隙駟晨轉窗蟾夜通步搖昏兮網黏翡翠芳褥
掩兮塵化蛩蛩閱刀尺之餘澤見巾箱之故封玩服儼兮猶具繁華謝兮焉從
想翩躚於是非求僊竅與冥蒙信奇術之可致嗟此生兮不逢徒注視以寂聽
恍神疲而目窮還抱影以獨出紛百哀而攻中系曰

龍門風霜苦別鶴哀鳴夜銜羽吳江波浪深雌劍一去無遺音悲之來兮憤予
心洵如行波洊浸淫悵緣情而莫極思執禮以自箴已焉哉苒苒生死悠悠古
今乘彼一氣兮聚散相尋或鼓而興或罷而沈以無涯之情愛悼不駐之光陰

諒自迷其有分徒終怨於匪忱彼蒙莊兮何人予獨累歎而長吟

何卜賦

余既幻惑力命之說兮身久放而愈疑心回寃其莫曉兮將取質夫東龜楚人俗巫而好術兮叟有鬻卜而來思乃招而祝之曰嘻人莫不塞有時而通伊我今久而愈窮人莫不病有時而閒伊我今久而滋蔓吾聞人肖五行動止有則四時轉續變於所極一歲之旱人思具舟三月之熱人思具裘極必反焉其猶合符予首圓而足方予腹陰而背陽胡形象之有肖而變化之殊常經曰剝極則賁居賁而未嘗剝者其誰否極受泰居否而未嘗泰者又其誰鶴胡不截鳧胡不裨夔何罰而蹠蹕虻何功而扶持紛紜恣睢交作舛馳似予似奪似信似欺孰主張之問于子龜卜者曰招我以粗問我以微有天下之是非有人人之是非在此爲美兮在彼爲蚩或昔而成或今而虧君問曷由主張其時時乎時乎去不可邀來不可逃淹淹兮孰捨孰操烏喙之毒董雞首之賤毛各於其時而伯音霸其曹屠龍之伎非曰不偉時無所用莫若履豨作俑之工非曰可珍時

有所用貴於斲輪絡首縻足兮驥不能踰跬前無所阻兮跛鼈千里同涉于川
其時在風沿者之吉沂者之凶同藝于野其時在澤伊種之利乃穆之厄故曰
是耶非耶主者時耶諒淑惡之同出兮顧所丁之若何夫如是得非我美失非
我恥其去曷思其來曷期姑蹈常而俟之夫何卜爲言訖執龜而起予退而作
何卜賦於是蹈道之心一而俟時之志堅內視羣疑猶冰釋然

謫九年賦

古稱思婦已歷九秋未必有是舉爲深愁莫高者天莫濬者泉推以極數無踰
九焉伊我之謫至於數極長沙之悲三倍其時廷尉不調行當跂而天有寒暑
閏餘三變朝有考績明幽三見顧堯之明兮亦昏墊而有歎歎息兮徜徉登高
高兮望蒼蒼突弁之夫我來始黃合抱之木我來猶芒山增昔容水改故坊童
者鬱鬱兮而涸者洋洋天覆地生翦兮無傷彼族而居鄉之投荒彼軒而遊昨
日桁楊信及澤濡俄然復常稽天道與人紀咸一償而一起去無久而不還焚
無久而不理何吾道之一窮兮貫九年而猶爾噫不可得而知庸詎得而悲苟

變化之莫及兮又安用夫肖天地之形爲

望賦

邈不語兮臨風境自外兮感從中晦明轉續兮八極鴻濛上下交氣兮羣生異容發孤照於寸眸驚遐情乎太空物乘化兮多象人遇時兮不同嗟乎有目者必騁望以盡意當望者必緣情而感時有待者瞿瞿忘懷者熙熙慮深者瞠然若喪樂極者沖然無違外徙倚其如一中糾紛兮若迷望如何其望最樂晞慶霄兮溯阿閣如雲兮天顏咫尺如草兮臣心踊躍扇交翟兮歲蕤旗升龍兮蠖略日轉黃道天開碧落凝瑞景於庭樹掬非煙於殿幕望如何其望且懽登灞岸兮見長安紛擾擾兮紅塵合鬱蔥蔥兮佳氣盤池象漢兮昭回城依斗兮闌干避御史之驄馬逐倖臣之金丸望如何其望攸好宗萬靈兮越四隩漢帝仙臺兮秦皇海嶠霓衣踊于河上馬跡窮于越徼紫氣度關而斐豐神光屬天而照耀睨眷眷以馳精聳專專而觀妙望如何其望有形視蠢蠢兮窮冥冥楚塞氛惡兮蕭關燧明暈籠孤月兮角奮長庚沙多似雪磧有疑城煙雲非女子之

氣草木盡王者之兵審曳柴之虛警破來騎之先聲信有得於風馬示無言於
旆旌望如何其望且慕恩意隔今年光度雕輦已辭兮金屋何處長信草生兮
長門日暮倏翠華之儻來仰玄天以自訴況復湘水無還漳河空注淚染枝葉
香餘紉素風蕭蕭兮北渚波煙漠漠兮西陵樹夫不歸兮江上石子可見兮秦
原墓拍琴翻朔塞之音挾瑟指邯鄲之路望如何其望最傷俟環玦兮思帝鄉
龍門不見兮雲霧蒼蒼喬木何許兮山高水長春之氣兮悅萬族獨含嘯兮千
里目秋之景兮懸清光偏結憤兮九回腸羨環拱於白榆惜馳暉於落桑諒衝
斗兮誰見伊戴盆兮何望平聲豈止蘇武在胡管寧浮海送飛鴻之滅沒附陰火
之光彩鶴頸長引烏頭未改恨已極兮平原空起何時兮在山東永望如何傷
懷孔多降將有依風之感宮人成憶月之歌歌曰張衡側身愁思久王粲登樓
日回首不作渭濱垂釣臣羞爲洛陽拜塵友入士而事替然此語亦前朝平

百韻至山陽城賦

并序

陳器而隨計令會同竺氏之五孫王毅之舉基覽賦

山陽故城遺趾數雉四百之運終於此墟裔孫作賦蓋閱漢也詞曰

昌黎公四

我止行車實涕于山陽之墟是何蒼莽與慘悴春陵之氣兮焉如踣昌運於四百辭至尊而伍匹夫有利器而倒持兮曾何芒刃之足舒懿王迹之肇基暨坤維之再敷邈汜陽與鄗上悅蛇變而龍攄痛人亡而事替終此地焉忽諸嗟乎積是爲治積非成虐文景之欲處身以約播其德芽迄武乃穫桓靈之欲縱心於昏然其妖燄逮獻而焚彼伊周不世兮奸雄乘釁而騰振物象灌以易位被虛號而陽尊終勢殫而事去胡竊揖讓以爲文嗚呼維神器之至重兮蓋如山之不騫使人得譬乎逐鹿固健步者所先諒人事之云爾孰云當塗之兆也自天亂曰久矣莫可追陞彼墟兮噫嘻躅遺武兮貽後王之元龜

秋聲賦

并序

相國中山公賦秋聲以屬天官太常伯唱和俱絕然皆得時行道之餘興猶動光陰之歎况伊鬱老病者乎吟之斐然以寄孤憤
碧天如水兮窅窅悠悠百蟲迎莫兮萬葉吟秋欲辭林而蕭颯潛命侶以啁啾送將歸兮臨水非吾土兮登樓晚枝多露蟬之思夕草起寒螿之愁至若松竹

含韻梧楸蚤脫驚綺疏之曉吹墮碧砌之涼月念塞外之征行顧閨中之騷屑
夜蛩鳴兮機杼促朔鴈叫兮音書絕遠杵續兮何泠泠虛窗靜兮空切切如吟
如嘯非竹非絲當自然之宮徵動終歲之別離廢井苔合荒園露滋草蒼蒼兮
人寂寂樹撼撼兮蟲咿咿則有安石風流巨源多可平六符而佐主施九流而
自我猶復感陰蟲之鳴軒歎涼葉之初墮異宋玉之悲傷覺潘郎之么麼嗟乎
驥伏櫪而已老鷹在韝而有情聆朔風而心動盼天籟而神驚力將瘳兮足受
繼猶奮迅于秋聲

劉賓客文集卷第一

... 卷一 ...

... 卷一 ...

... 卷一 ...

... 卷一 ...

劉賓客文集卷第二

碑上

代郡開國公王氏先廟碑

彭陽侯令狐氏先廟碑

高陵縣令劉君遺愛碑

故吏部侍郎奚公神道碑

代郡開國公王氏先廟碑

唐制五等有爵服而無山川登于三事得立四廟備物崇祀以交神明敬先報

本以輔孝治有國之令典也維長慶三年前相國王公始卜廟于西京崇業里

公時鎮劍南東川上章曰臣涯官秩印綬品俱第三請如式以奉宗廟制曰可

是歲仲冬申命長男孟堅祔其主于三室明年公入為御史大夫復以十二月

躬行烝祭開歲公出梁州就拜司空禮崇異數廟加祀室大和二年增新室既

成祔顯考于尊位告饗由禮觀之者以為世程第一室曰上儀同齋州別駕府

君諱元政以妣博陵崔氏配第二室曰湖州安吉縣令贈尚書刑部員外郎府君諱實以妣贈扶風縣太君馬氏配第三室曰朝散大夫青州司馬贈戶部侍郎府君諱祚以妣贈武威郡太夫人賈氏配第四室曰温州刺史贈太尉府君諱冕以妣贈魯國太夫人博陵崔氏配初周靈王太子晉遇浮丘公化爲神仙時人號曰王家其後遂以命氏顯於秦者曰翦三世將秦師子孫分居晉代闕東漢有徵君霸霸孫甲亦號徵君徙居祁縣爲著姓故至于今爲太原人自漢涉魏益以熾昌凡十葉至後魏度支尚書廣陽侯罔廣陽有二子神念神感神念南奔梁神感北仕齊惟儀同府君廣陽侯五代孫也唐興于太原實從義旗佐成王業故有開府儀同之寵惟刑部府君以功臣子理二邑不躋貴仕故有錫美後大之祥惟戶部府君幼孤以孝聞於鄉曲未冠以文售於有司由前進士補延州臨安縣主簿會詔徵賢良策在甲科授瀛州饒陽尉歲滿遷渭南天后在神都而東畿差重遂由渭南轉河陽適逢建萬象神宮甸內吏分董其役因上書切諫絲是名益聞開元初以大理司直馳軺車聯讞大獄閩禺朔漠所

至決平蚤以變棘傷生晚成劇恙樂就夷曠故不至大官惟太尉府君生於治平時以文學自奮年十有五貢然從秋賦明年春升名于司徒又一年玄宗御層樓發德音懸文詞政術科以烝髦士府君策最高授太常寺太祝未幾復以能通道德南華沖虛三真經進蓋屋尉天寶中歷右拾遺左補闕禮部司駕二外郎屬幽陵亂華遣兵南服因佐閩粵改檢校比部郎中行軍司馬時中原甫寧江南爲吉地二千石多用名德乃以府君牧温州朝廷虛公卿以俟高第及聞訃永嘉人輟春罷社搢紳闕以不淑相弔焉雖位負于道而邁德垂矩後之人得以纘承丕揚之其儲休啓祐有自云爾生三子皆聰明絕人長曰沼以神童仕至檢校禮部郎中次曰潔以奇文仕至國子司業今代郡公實季子也蚤在文士籍射策連中咸世其家貞元中德宗聞其名自藍田尉召入禁中視草厥後三典書命再參內廷憲宗器之付以國柄翊贊有道雖冊免常居大僚今年自梁州請覲上思用舊臣爲羽儀遂領太常其公府如故以一心事六君顯官重務靡不揚歷且夫起諸生至三公而心愈卑道益廣出授黃鉞以伯諸侯

入服華章以謁家廟追崇極大位血食備多室享全榮而奉昭薦嗚呼公侯之
孝歟宜書廟器以視喬公之三鼎其辭曰太常其公佩成以一少事六皆願
閔宇神庭邃清而嚴上公之儀四室耽耽犧以潔牲柔以大糝交神尚敬合魄
尚氣子姪宗工駿奔奉事副笄侈袂儼恪居次孝孫兢兢執爵而升以裸以濯
以伏以興水陸具來羶薌畢登列于園方其氣增增乃禴乃嘗敬而追遠二昭
二穆孝以尊本瞻瞻凡幄躡躡堂梱禮成起慕涕落玄袞濡露踐霜誰無永懷
不如達者哀與榮偕逢時奮庸誰不得位不如仁人以道爲貴惟公之達今名
以顯親惟公之仁今德以澡身六朝之清臣一代之全人宜其世家翼翼振振
罔不祇肅于廟之門

彭陽侯令狐氏先廟碑

今上元年七月十三日汴州刺史宣武軍節度副大使知節度事汴宋亳等州
觀察處置使銀青光祿大夫檢校禮部尚書兼御史大夫上柱國彭陽縣開國
伯令狐公西嚮拜章上言守臣楚蒙被恩澤列爲元侯得立家廟以奉常祀制

書下其奏于有司於是善相考詳得地于京師通濟里居無何新廟成公以守藩故甲命季弟監察御史定卜牲練日越八月丁亥祔饗三室墼墉以尙幽設幄以迎精禮無尤違神用寧謚第一室曰秦州上邽縣尉諱濬以妣太原王氏配第二室曰絳州昌明縣令贈吏部尙書諱崇亮以妣贈太原郡夫人河東柳氏配第三室曰太原府功曹參軍贈太子太保諱承簡以妣贈魏國太夫人富春孫氏配明年十月公由浚郊以介圭入覲真拜戶部尙書進爵爲魯侯既辭戎旃得以列侯謁三廟是歲南至上不視朝又得以時展祭先期致齋栗然以敬旣齋盡志歆然永思奉其百順陳以具物始躋而虔恭終獻而汎瀾旣卒事顧麗牲之石宜有刊紀乃俾家老授其牒于所知云令狐晉邑也晉大夫魏顓以輔氏之功始封焉其易名曰文國語所謂令狐文子是已其先周文王之昭畢公高之裔畢萬爲晉卿始封于魏自萬至顓蓋四世其後三十七世藍田侯蚪仕拓跋魏爲燉煌郡太守子孫因家遂占數爲郡人藍田之孫熙在隋爲納言惟上邽府君納言之玄孫道克肖而位不至惟尙書府君西州之右族光未

耀而德已基惟太保府君志爲君子儒以經明居上第調補陽安縣主簿歷正
平尉汾州司法參軍陝州大都督府兵曹終于太原府首掾始以顓經進既仕
旁通百家愛穀梁子清而婉左丘明國語辨而工司馬遷史記文而不華咸手
筆朱墨究其微旨愷悌以肥家信誼以急人德充齒耄獨享天爵故休祐集于
身後徽章流乎佳城凡以子貴承澤降命書告第者始贈尙書祠部郎中再贈
禮部尙書三加右僕射四爲今稱一作四進太保五爲上公先夫人亦四徙封蜜印纍纍邦

族聳慕生三子皆才彭陽公爲嗣次子從端實肅給今爲檢校膳部郎中參河
東軍事季子前所謂監察御史今主柱下方書溫敏而有文綽綽然真令兄弟
唯彭陽以詞筆取科名累參侍從由博士主尙書牋奏典內外書命遂登樞衡
言文章者以爲冠擁節總戎率身和衆留惠于盟津變風于浚都言方略者以
爲能夫浚師曠喑難治乘釁竊發寢成習俗莅止五載飲和革心束馬來朝熊
羆隕涕問公還期觴必祝之留爲常伯旋命居守汴人聞公之東近而愈懷翹
翹瞿瞿盡西其首言遺愛者可紀焉貴而率禮老而能慕怵惕乎霜露齋莊乎

廟祧睦其仲季施及鄉黨言孝悌者歸厚焉勒名于碑以代夷鼎文曰
已孤之孝莫如備物顯顯新廟四阿三室時惟仲月卜用柔日醴醢苾芬牲牲
博脂饗甑在堂蕭聲在庭孝孫烝烝躬若奉盈低簪委紳薦俎登鉶盥交感
涕流緣纓禮以備儀誠以致美祖考來格錫之丕祉工祝告訖退循軒庀乃授
風人作詩以紀猗歟彭陽之寵光佐憲皇穆皇西省東臺迭爲侍郎國之大政
咨爾平章敬宗凝旒俾鎮離丘入爲地官令守東周彭陽之忠厚宜介福以壽
東郊旣釐可復朝右緜緜其胄系于周舊由我顯起必昌其後大和紀元作廟
之首刻碑廟門龍集己酉

高陵縣令劉君遺愛碑

縣內之大夫鮮有遺愛在其去者蓋邑居多豪政出權道非有卓然異績結于
人心浹于骨髓安能久而愈思大和四年高陵人李士清等六十三人思前令
劉君之德詣縣請金石刻縣令以狀申府府以狀考于明法吏吏上言謹按寶
應詔書凡以政績將立碑者其具所紀之文上尙書考功有司考其詞宜有紀

者乃奏明年八月庚午詔曰可今書其章明有以結人心者揭于道周云涇水東行注白渠醜而爲三以沃關中故秦人常得善歲按水部式決洩有時畎澮有度居上游者不得擁泉而顛其腴每歲少尹一人行視之以誅不式兵興已還寢失根本涇陽人果擁而顛之公取全流漫原爲畦私開四瀆澤不及下涇田獨肥宅邑爲枯地力旣移地征如初人或赴訴泣迎尹馬而占涇之腴皆權倖家榮勢足以破理訴者覆得罪繇是咋舌不敢言吞冤銜忍家視孫子長慶三年高陵令劉君勵精吏治視人之瘼如瘰疽在身不忘決去乃循故事考式文暨前後詔條又以新意請更水道入于我里請杜私竇使無棄流請遵田令使無越制別白纖悉列上便宜掾吏依違不決居二歲距寶曆元年端士鄭覃爲京兆秋九月始具以聞事下丞相御史御史屬元谷實司察視持詔書詣白渠上盡得利病還奏青規中上以谷奉使有狀乃俾太常撰日京兆下其符司錄姚康士曹掾李紹實成之縣主簿談孺直實董之冬十月百衆雲奔憤與喜并口謠手運不屑鼙鼓揆功什七八而涇陽人以奇計賂術士上言曰白渠下

高祖故墅在焉子孫當恭敬不宜以畚鍤近阡陌上聞命京兆立止絕君馳詣
府控告具發其以賂致前事又謁丞相請以頹血污車茵丞相彭原公斂容謝
曰明府真愛人陛下視元元無所恡第未周知情僞耳卽入言上前翌日果有
詔許訖役仲冬新渠成涉季冬二日新堰成駛流渾渾如脈宣氣蒿荒漚冒迎
耜澤澤音釋開塞分寸皆如詔條有秋之期投鍤前定孺直告已事君率其寮躬
勞徠之烝徒謹呼奮襁褓而舞咸曰吞恨六十年明府雪之擯姦犯豪卒就施
爲嗚呼成功之難也如是請名渠曰劉公而名堰曰彭城按服引而東千七百
步其廣四尋而深半之兩涯夾植杞柳萬本下垂根以作固上生材以備用仍
歲旱沴而渠下田獨有秋渠成之明年涇陽三原二邑中又攤其衝爲七堰以
折水勢使下流不厚君詣京兆索言之府命從事蘇特至水濱盡撤不當攤者
繇是邑人享其長利生子以劉名之君諱仁師字行輿彭城人武德名臣刑部
尙書德威之五代孫大曆中詩人商之猶子少時好文學亦以籌畫干東諸侯
遂參幕府歷尹劇縣皆以能事見陟率不時而遷既有績于高陵轉昭應令俄

兼檢校水曹外郎充渠堰副使且錫朱衣銀章計相愛其能表爲檢校屯田郎
中兼侍御史幹池鹽于蒲錫紫衣金章歲餘以課就加司勳正郎中執法人
爲循吏理財爲能臣一出於清白故也先是高陵人蒙被惠風而惜於捨去發
于胸懷播爲聲詩今采其旨而變其詞志于石文曰

噫涇水之逶迤漑我公兮及我私水無心兮人多僻錮上游兮乾我澤時逢理
兮官得材墨綬繫兮劉君來能愛人兮恤其隱心旣公兮言旣盡縣申府兮府
聞天積憤刷兮沈痾痊劃新渠兮百畝流行龍虵兮止膏油遵水式兮復田制
無荒區兮有良歲嗟劉君兮去翱翔遺我福兮牽我腸紀成功兮鑄美石求信
詞兮昭懿績

唐故朝議郎守尚書吏部侍郎上柱國賜紫金魚袋贈司空奚公神道

碑

嗚呼有唐清臣尚書吏部侍郎奚公貞元十五年十月甲子薨于位詔贈禮部
尚書太常考行諡曰某是歲臘月丁酉葬于萬年縣之某原後三十有四年子

爲諸侯爲大夫門戶有煒於是門下生琢石紀德揭于新阡云

公諱陟字殷衡其先在夏爲車正以功封于薛下故以降爲譙郡人或因仕適楚復之秦今爲京兆人隋唐之際再世以明經爲博士家有賜書曾祖蘭亦以文學爲太子司議郎大父乾繹仕至光州刺史烈考諱某有道而尙晦終徐州司功參軍贈和州刺史由子貴也天以大運生萬物而以正氣鍾賢人至和來宅其德乃具公實有焉幼而擢陵苕之秀長而成清廟之器羣倫月旦咸以第一流處之及從鄉賦暨升名太常果居上第四年詔郡國徵賢良設四科以盡材公居文詞清麗之目授弘文館校書郎時德宗新卽位聲恒虜庭西戎畏威底貢內附詔諫議大夫崔河圖持節卽虜帳以報之使臣欲盛其賓寮以自大遂嘿表公爲介換大理評事除書到門公方爲人子不敢許以遠稱病弗果行歸寧壽春養志盡敬丞相楊炎勇於用才擢公爲左拾遺奉安輿而西未幾再集荼蓼居後喪將闋是歲建中四年京師急變黃屋順動狩于巴梁公徒行閒道以歸王所旣中月而詔授起居郎充翰林學士創鉅愈遲病不拜職改太子

司議郎從大駕回入尚書爲司金元士且參權筦之務有頃持愍冊宣恩于薊門將行錫銀朱於青蒲上復命稱旨轉吏部外郎是曹在南宮爲眉目在選士爲司命公執直筆閱簿書紛拏盤錯一瞬而剖時文昌缺左右丞都曹差重遂轉左司郎中尋遷中書舍人執事者繫公識精以斟酌大政非獨用文飾也會江淮閒民被水禍上愍焉特命公宣撫之時以便宜及物赤車所至如東風變枯條其利病復奏咸可轉刑部侍郎時主計臣延齡以險刻貴倖而與京兆尹相惡以危事中之尹坐譴己又逮繫其吏峻絕之事下司寇主奏議者欲文致而甘心焉公侃然持平挫彼嶽嶽君子聞之善其知道不私刑曹旣清以餘力兼領選事居一年授權知吏部侍郎又一年卽真是秩言能審官者本朝有裴馬盧李四君子物論以公媿焉時得疾發癰有國醫方直禁中上促遣如第且敕之曰某賢臣也悉術以治之及有司以不起聞上震悼加等公娶琅琊王氏石泉公之曾孫女壻皆一時彥士長子某蚤不祿第二子敬則歷太僕少卿今爲濮州刺史兼御史中丞賜金紫以廉最就加貴秩俾視九卿第三子敬玄以

詞苑似續登文科歷左補闕今爲尙書刑部郎中第四子炅舉進士最小子某
咸砥礪纂脩宜爲名公家子其邁德垂裕之光乎公少以名器自任及顯達急
於推賢視其所舉則在西省薦權丞相由右史掌訓詞在中銓表楊僕射由地
曹郎綜吏部二公後爲天下偉人凡執文章權衡以揣量多士一入中禁考策
詞三在天官第章句披沙割璞由我而顯者落落然居多推是風鑒移于大冶
則鎔範之內無非祥金嗟乎天不遐其福而孤民望使由庚之什不作於貞元
中惜也初公旣齊終詔贈大宗伯後以第三子在郎位被霑澤再追襲至司空
故昔之葬儀用常伯而今之碑制用三公云銘曰

仁麟智龍爲瑞一辰未若君子瑞于人倫惟唐德宗道類漢宣責實繩下風稜
言言公丁斯時籍在雋賢從難表節執羈而還帝曰汝器黃流瑟然可爲大僚
左右化源乃飾王度乃馳韜軒旣執刑柄亦操吏權陽和熙熙貯在顏闕守法
持正嶷如秋山火不侵玉倖臣畏伏鳳鳴祥煙梟噪低陸帝方倚用天不假年
公寐無寤其名愈遠門人達者赤舄玄袞公居甚卑其德愈尊兩子朝服駢驅

朱輪佳城何在胄貴之里螭首龜趺熹輝是紀嗚呼後人下拜于此

劉賓客文集卷第二

...

...

...

...

...

...

...

...

...

...

...

劉賓客文集卷第三

碑中

唐故福建都團練觀察使薛公神道碑

許州文宣王新廟碑

唐故兼御史中丞贈太師崔公神道碑

唐故宣歙池都團練觀察使王公神道碑

唐故邠寧節度使史公神道碑

唐故福建等州都團練觀察處置使福州刺史兼侍御史中丞贈左散

騎常侍薛公神道碑

薛在三代爲侯國介于鄒魯閱傳世三十有一爲齊所并其公子犇楚錫土田于沛漢末避仇之成都曹魏平蜀徙家汾陰遂爲河東臨晉人自奚仲爲夏車服大夫距今數千年乘軒服冕寫奕冠世言氏族者署爲關內甲姓天意若曰始有功於車服錫爾子孫世世有之公諱審字某曾祖寶胤以名家子且有學

行歷尙書郎雍州司馬邠州刺史王父繪有雋材刺三郡金密縣皆以治聞累
績至銀青光祿大夫封龍門侯烈考承矩以文亡害仕至大理丞公幼承前人
之覆露補崇文生歲滿得調主簿書于毫之譙苦二邑又尉于東畿之河清貞
元中上方與丞相調兵食思得通吏治而習邊事者計相以公爲對乃授監察
御史裏行充京北水運使局居鴈門主穀糴具舟楫募勇壯且便弓矢者爲榜
夫千有餘人隸尺籍伍符制如舟師詔以中貴人護之聲震塞上每發粟沂河
北行涉戎落以饋緣邊諸軍及乘障者雖河塞回遠必克期如合符一歲中省
費萬計累加侍御史內供奉賜緋魚袋有司條白其勞入拜殿內史未幾淮海
節將以戎倅缺聞事下丞相御史擇可者僉曰公政事已試遂授檢校戶部外
郎兼御史淮南軍司馬尋轉駕部郎中錫以金紫遇府遷中命真相趙國公帶
中書侍郎代之公至行臺留務趙公文茵及境視置郵供帳及郊視將迎部伍
下車視簾幃器備乃曰信奇才也此不足以展驥朝廷知之擢爲泗濱守旣報
政就加御史中丞俄遷福建都團練觀察使閩有負海之饒其民悍而俗鬼居

洞砦音寨

家桴筏者與華言不通公兼戎索以治之五州民咸說元和十年某月某日薨于位年六十七贈左散騎常侍夫人趙郡李氏無兒蚤世繼夫人隴西李氏檢校禮部尚書河東節度使說之女生子凝爲嗣季子茂弘以諸侯禮儀返葬故里蛾眉原從周也後二十有三年元曰開成凝爲平盧從事謹按甲令龔碑石來乞詞以垂于悠久初公治粟于朔陲愚方冠惠文冠察行馬外事聆風相厚謂可妻也以元女歸之明年愚入尚書爲郎職隸計司因白計相召公來會府行有日矣遇內禪惟新愚以緣坐左貶閒關外沒竟不克面然而公之德善灌注心耳孝悌爲根砥誠明梗葉之直方爲天質禮讓緣飾之所至藹然繇此道也公初下世故人丞相李太師誌其墓其略曰弘深莊重幹敏絕人此與遊者傳信之詞也豈誣也哉故作銘曰

河汾齋淪鼎氣歊雲散爲昌光凝爲賢人常侍之生其宗孔碩從祖昆弟誦誥三百文館入仕幽龍未光尺木爲階歛然欲翔司會知材績宣朔方邊師萬喉俟我羸糧泝于黃河路出戎疆募乃勇士早衣挽航膺索臂弧穹廬在旁虜聞

公名憚不敢攘安北以南列城相望率有儲待皆成金湯入居殿中分巡輦下
淮海軍大往爲司馬軍中之治可移諸民乃牧于泗乃廉于閩閩悍而囂夷風
脆急恩信綏之妥然如螫閩方不淑天奪其福公薨于寢玄頰以復天王廢朝
贈之金貂莓莓晉原鬱矣中條大墓舊阡松楸蕭蕭笳鼓以歸德音孔昭

許州文宣王新廟碑

歲在丙辰元日開成許州牧尙書杜公作文宣王廟暨學舍于兌隅革故而鼎
新也前年公受社與鉞且董淮陽汝南之師八月上丁釋菜于宣父之室陋宇
荒階不足回旋已事而歎乃詢黃髮有鄉先生前致辭曰自盜起幽陵許爲兵
衝連戰交猝卒無寧歲耳悅鉦鼓不聞弦歌目不知書不害爲智爾來生聚教
養起居祖習壹出於軍容今幸天子憐許民爲擇賢侯此人人思治之時也公
曰諾吾當先後之於是元年脩戎律以通衆志次年成郡政以蠲民瘼季年崇
教本以厚民風我言旣從乃卜新宮灑水之瀕城池在東登登其杵坎坎其斧
繩之墨之鑿柄枝梧載塹載塗默焉陵虛寢廟弘敞齋宮嚴闕軒墀廂廡儼雅

清潔門庭牆仞望之生敬外飾觚稜中設黼幄嚮明當宁用王禮也堯頭禹身
華冠象佩之容取之自鄒魯及門都奧偶形畫像之儀取之自太學尊彝籩豆
青黃規矩之器秉周禮也犧牲制幣薦獻陞降之節遵國章也藏經于重檐斂
器于庑櫺講筵有位鼓篋有室授經有博士督課有助教指蹤有役夫灑掃有
廟幹公又割隙地爲廣圃蒔其柔蔬而常菹旨蓄之禦備捨己俸爲子錢權其
孳贏而鹽酪釭膏之用給濟濟莘莘化行風驅家慕恭儉戶知敬讓父誨其子
兄規其弟不遊學堂與撻市同絲是縻勇爵戴鷩冠者往往弭雄姿而觀習禮
矜甲冑者知根於忠信服縵胡者不敢侮逢掖教化之移人也如置郵焉冬十
一月許人以新儒宮成來告且乞詞欲行乎遠也公名悰字永裕故丞相岐國
公之孫岐公弼諧三帝碩學冠天下嘗著書二百餘篇言禮樂刑政古今損益
統名曰通典藏在石室副行人閒今孝孫聿脩之刑乎事業播于聲詩懿哉能
世其家也禹錫昔年忝岐公門下生四參公府近年牧汝州道許昌躬閱其政
故不得讓遂銘于麗牲之碑銘曰

許分韓魏四征之地兵興已還其鬪嘖嘖亦有儒宮軋于兵閒賢侯戾止思樂
泮水俾人嚮學王化之始便地爰相新規鬱起廟貌斯嚴堂煌有煒秩秩禮物
祁祁胄子入于門牆如造闕里春誦夏弦載颺淑聲風于閭閻浹于郊垌途讓
斑白家尊父兄與化而遷其猶性成昔之委巷相諾交侮今逢親戚不道媿語
昔之連營誇力使酒今遇賓客斂容拱手魯有泮林烏革其音許崇學敷民說
其教鑄于圭石以志新廟

唐故朝散大夫檢校尙書吏部郎中兼御史中丞賜紫金魚袋清河縣
開國男贈太師崔公神道碑

太師名倜字某清河東武城人太公望旣封于營丘子伋嗣侯伋之孫曰穆伯
食邑于崔遂以爲氏後十四世至秦末東萊侯意如東萊之子伯基始居清河
又十五葉生琰爲魏名臣又九葉生休仕後魏爲七兵尙書七兵之弟曰寅爲
樂安太守公卽樂安八代孫始以門子補鄭州參軍力行好學於子道以孝聞
處伯仲閒以友聞讀易至編絕以精義聞至德中戎羯猾夏王師出征公少有

奇志思因時以自奮乃作伐鯨鯢賦上獻既聞爾矣果器之會第五丞相以善言利得幸盡付利權始有鹽鐵使之目慎選寮屬表公爲介轉臨晉縣丞處繁應卒鉉刃不頓府罷再遷至太子司議郎韓晉公時爲戶部侍郎掌邦賦急於用材薦公爲監察御史主河東租庸之務尋轉侍御史充京東平糴使建中初德宗始親萬幾儲精治本有漢宣與我共理之歎謂大臣求可當良二千石者遂以公帶本官權知袁州刺史期月有成詔書顯揚就加真秩益以金紫居無何韓晉公爲丞相制國用思公前績乃傳召之抵京師授檢校戶部郎中兼侍御史幹池鹽于蒲脩牢益謹衡石煎和旣精飴散乃盈商通而薦至吏懼而循法民不絀網而國用益饒歲杪會其所入贏羨什百詔下褒其能轉吏部正郎兼御史中丞且加五等之爵方倚以重任天富其材而不遐其福享齡六十有五貞元七年某月某日遘疾終于治所上聞悼之因降愍冊贈鄭州刺史賚錢三百萬以備飾終之禮明年某月某日返葬于成周之偃師從世墓也累贈至太師夫人隴西李氏汾州司倉參軍成一之女生才子六人長曰邠及公時已

爲左拾遺後至太常次曰鄴至太府卿次曰鄴至外臺尙書次曰郇今爲廷尉
次曰鄴至執金吾季曰鄴今爲太常卿同中書門下平章事惟夫人姑臧冠族
以蘋蘩組紉輔佐君子爲令妻積三十餘年以慈儉忠厚訓誡諸子爲賢母二
十有三年當永貞初順宗踐阼澤流自葉長子邠時爲詞臣草冊書以文當進
階遂上疏乞移榮於親優詔允之特封清河郡太君士林聳慕皆自痛其不及
邠爲太常鄴爲大農咸白髮貴綬以奉膳脩諸季各以簪裾給事左右愉愉然
先意無違言世榮者舉無與比以子貴累封贈至涼國太夫人元和八年三月
十六日捐館舍壽七十有九是歲十月某日合祔惟太常及尙書暨今相國皆
自中書舍人爲禮部侍郎凡五貢賢能書得士百四十有八人言兄弟者許爲
人瑞崔氏之門六人皆入文昌宮其閒三人歷八侍郎統而論之三大卿兩連
率二翰林學士一執金吾言冠冕者許爲世雄與姑臧李范陽盧世爲婚媾入
于姻黨無第二流言門閥者許爲時表太常二子亦以才能同入尙書璜爲吏
部郎權爲司勳郎其它支孫未登金閨籍者詵詵然魚貫而進文業甚似而孝

謹不衰猗歟君子之澤其所從來遠而有光乎開成己未歲七月甲辰相君受
詔于明庭始操國柄仲月奉嘗事于家禮成起慕悄然永懷曰古者卿大夫廟
有鼎墓有碑皆銘之以紀先德也今備位宰相敢不敷前人之耿光乃俾家老
條白事功咨於學古者徵其詞尙信也又命宗祝卜柔日告于廟盡誠也儀甚
備而敬有餘斯所謂達禮之君子遂刊勒如式揭于道周銘曰

奕奕四姓崔爲之冠瞻其門牆倬若雲漢善積家肥子孫多材如彼棖棟必生
徂徠太公之後彌二千祀炯如貫珠焯見圖史顯顯太師丕承德基構于其堂
亦旣暨茨生逢艱虞戎夏交師獻賦伐叛忠存乎詞兵興事叢飛輓四馳歷踐
劇職視屯如夷乃主平糴乃分竹使治粟爲邦其道一致蒲實近地鹽爲利泓
使車來思刻弊立程吏廉商通歲倍其贏奏課連最德音褻明就加執法好爵
兼榮天賦之才不與壽并生樹德本沒揚淑聲上聞軫懷侑樂爲停贈祿之禮
侔于公卿萬古貽訓根於孝友太丘種德乃稔身後家有令子妻爲壽母三十
餘年人倫之道六子來侍如龍如虎衆婦來饋維筐及筥佩玉鳴環交響庭戶

珍做宋版印
申申秩秩歡不踰矩昔爲甲族今爲興門天爵人爵蔚然兩尊先德蔭之默如
重雲孕和含粹濯潤本根景毫之原圖書之川陽陵帝壇旁礪回環世安其神
世嗣其賢聆德風者拜于碑前

唐故宣歙池等州都團練觀察處置使宣州刺史兼御史中丞贈左散

騎常侍王公神道碑

常侍諱質字華卿始得姓自周靈王太子晉賓天而仙時人曰王子因去姬爲
王氏自秦漢以還世多顯名由今而上十有一代名傑任元魏爲并州刺史子
孫因家遂爲太原祁人并州六代孫名通字仲淹在隋朝諸儒唯通能明王道
隱居白牛谿游其門皆天下儔傑著書行於世旣沒謚曰文中子文中生福祚
爲蔡州上蔡主簿上蔡生勉舉進士徵賢良皆上第仕至河中府寶鼎令寶鼎
卽公之曾祖也祖諱怡渝州司戶參軍考諱潛揚州天長縣丞贈尙書吏部郎
中公其季子也始文中先生有重名於隋末其弟績亦以有道顯于國初自號
東臯子文章高逸傳乎人閒議者謂兄以大中立言弟游方外遂性二百年閒

君子稱之雖四夷亦聞其名字公雅有遠志常自忖度我大名之後不宜無見焉遂力學厚自淬琢於春秋得其公是於禮得之約僑居淝水上躬督穡事善積於己而淮楚閒羣彥多與之游公歉然自少無進取意與游者激之曰卿文儒家子篤志如是盍求發聞去聲俾家聲不頽今夫以文學荏洋當世者誰如華

卿庸自棄邪入謀于闈門咸以外言爲是因決策而西在貢士籍天和內充不以時尚屑意角逐攻取初無此心如梗枿生于深林未始自貴而度材者一眄歆然在懷故以不爭而速售既登第東諸侯交辟之從主者書記于嶺南授正字參謀于淮右進協律郎其後佐許下暨梓潼南梁率爲上介官至兼監察御史司憲聞其賢徵入南臺轉殿內歷侍御史改尚書戶部外郎復爲知己所薦遷檢校司封郎中攝御史中丞紫衣金章充山南西道節度副使入爲尚書戶部郎中以方雅特立除諫議大夫會宋丞相坐狷直爲飛語所陷抱不測之罪大僚進言無益公率諫官數輩日晏伏閣上爲不時開便殿公於旅進中獨感激雪涕居多由是上怒稍解得從輕比公終以言責爲憂求爲虢州刺史宰相

惜去又重違誠請增之以兼御史中丞用示異於人也大凡以智謀而進者有時而衰以朴厚而知者無迹而固公雅爲今揚州牧贊皇公所知人不見其迹方在號略贊皇入相擢爲左曹給事中凡有大官缺必寵薦居數月遷河南尹又未幾鎮宛陵是三者中外所注意不旬歲而周歷之時論不以爲黨河南帝之別京其治尙體度風采而別白區處之宣城國之奧壤其治在東吏惠下蘇罷羸警剽輕而勞徠澄汰之公兩得其道不由一揆率身以儉而素風存任人以誠而羣務舉遇中貴人以禮而故態革內潔其志下盡其忠外無以撓於理三者具求政之有裨曷由哉在鎮三載開成元年十二月八日薨于位享年六十三監軍使上言有詔軫悼不視朝贈左散騎常侍明年八月十一日葬于河南府永寧縣洛川鄉史原從舊阡也初公娶于滎陽鄭氏生三女而沒今蓋祔焉一子曰慶存方亂矣猶子前太原府參軍扶執宗長書來請曰扶也蚤孤荷世父常侍之覆露今其嗣幼未任克家姑封琴書司管鑰以俟其長竊懼世父之德音不斂思有以垂于後者以誠告于從叔大司農復命曰俞謹鬻貞石以

乞詞無忽余昔爲郎與常侍同列已熟其行實及讀墓誌卽今丞相益州牧趙郡李公之文自稱爲忘形友其在宣州李公再入相議以第一官處之牢讓不取羔鴈所禮則河東裴夷直天水趙哲隴西李行方吳郡陸紹梁國劉蕢博陵崔珣人咸曰得士夫揚州少與也而見器益州寡合也而見親六從事材不一也而畢樂用是足以觀德庸可勿紀焉銘曰

隋有文中紹歟微言當時偉人咸出其門粹氣紆餘鍾于後昆常侍恂恂文中來孫發原高麓中泳後大蘭芽茁然秀出叢蒼善不近名其聲日彰行勇於退其道愈光哲者知之寘如周行以正持憲以文爲郎以和佐戎以惠臨邦以直司諫以公駁正守于三川頑民底定乃鎮于宣先馳淑聲邑中婆娑瞻我旆旌問誰詢謀濟濟君子問誰出內潔潔廉士道本乎心暢于四支治本乎正形于百爲黠吏斂手齊民揚眉江淮數空夜柝弗施公臥于齋邦民悽悽公衣升屋邦民行哭牙璋斯來柳翼言旋棠樹未老周人慕焉熊耳之陽泱泱洛川佳城在茲旣固且安松楸颺然石馬矯然過者必敬宛陵之阡

唐故邠寧慶等州節度觀察處置使朝散大夫檢校戶部尚書兼御史大夫賜紫金魚袋贈右僕射史公神道碑

僕射名孝章字得仁本北方之強世雄朔野其後因仕中國遂爲靈武建康人曾祖道德贈右散騎常侍封懷澤郡王祖周洛銀青光祿大夫檢校太常卿兼御史中丞北海郡王贈太子太保考憲誠蚤以武勇絕人積功至魏博節度使終于河中晉絳慈隰等州節度觀察使檢校司徒兼侍中河中尹贈太保其薨也大臣中書令晉國公裴氏爲之碑其名益顯公卽侍中之元子母曰冀國夫人李氏幼而聰寤父母賢而加愛焉及長好學遷善秀出儕輩鄴下諸兒號爲書生元和中太尉愨爲魏帥下令掄才於轅門取大將家翹秀者爲子弟軍列于諸校之上公獨昌言願效文職太尉深奇之遂假魏州大都督府參軍長慶二年常山衆叛害其帥沂國公田司徒於帳下沂公發迹于魏人猶懷之詔命其子布以尚書授鉞統魏兵問罪于北疆且報家禍布旣啓行士氣不振渙然內潰獨與冗從之旅偃旗而歸百憤攻中卒自引決先侍中時爲中軍都知兵

馬使兼御史中丞全師在野闐然推戴之請爲假侯以鎮定中貴人飛駟上聞
穆宗夜召翰林學士草詔書以真侯命之實有魏土從衆而合權也是歲公自
攝官轉本府士曹參軍兼監察御史賜朱衣銀印推恩以及子也一旦跪於父
母前進苦言曰臣竊惟大河之北地雄兵精而天下賢士心侮之目曰河朔閒
視猶夷狄何也蓋有土者多乘兵機際會非以義取今臣家父侯母封化爲貴
門君恩至矣非痛折節礪行彰信於朝廷無以弭識者之譏寤明君之意節著
於外福延于家乘時蹈機禍不旋踵言訖泣下數行父俞母贊天性交感三心
旣叶萬衆潛化天子聞而嘉之曰彼真有子乃授檢校太子左諭德兼侍御史
充節度副使累遷至散騎常侍兼御史大夫賜金印紫綬旣貳軍政事如命卿
弛張損益得以參決潛革故態人知嚮方大和二年滄景節度使李全略卒其
子同捷竊據故地詔下以文告弗革遂用大刑先侍中表請率先諸侯使元子
以督戰制曰可公承君父之命乃捐其軀一舉而下平原壓滄壘由是加工部
尙書及王師凱旋上表願一識承明廬詔允之遂赴北闕下得覲於便殿上曰

嚮吾始征滄州議者皆曰彼魏之姻也慮陰爲寇謀吾發使數輩以偵之其還也僉曰爾父瀝款於賓筵爾母抗詞于簾下願絕姻以立效其經始啓發出於爾心今滄海底平策勳之曰宜貴爾三族命爾父爲侍中遷鎮于近地加爾禮部尙書析相衛澶三州爲鎮以居之俾爾一門大榮以誇天下公拜稽首謝父遷讓己爵禮無違者翌日詔下于明庭人咸曰史氏之寵光古無有也牙旗碧幢方指東道侍中以帳下生變聞泰極而否當歌而哭迎柩于路仰天長號因葬于洛陽之邙山冀國夫人祔焉寢苦枕塊以所仇同天爲大酷未幾詔舉金革之義起爲右金吾將軍累表陳乞有司以違命督之輿疾卽路閒歲擢授鄜坊丹延等州節度觀察處置等使居四年遷鎮于滑一歲入爲右領軍衛大將軍旋改右金吾大將軍又授鉞于邠土孟秋至治所首冬遘疾拜章入覲不克展和鸞儻革之儀薨于靖恭里之私第享齡三十九當開成三年十月二十日上聞而悼之不視朝一日贈尙書右僕射明年二月歸葬于洛都夫人琅邪王氏祔焉繼室深澤縣君博陵崔氏有一子曰煥生七年而孤僕射之喪自復魄

至葬當門戶備祭祀建碑表皆縣君之能且命其家老具事功來請曰嫠不恤
家而憂幼嗣不知其先人之官業乞詞以傳于後也君子以爲知禮謹書之銘
曰
斗極之下崆峒播氣鍾于侍中孔武且貴奉上致命宜昌後嗣僕射承之良弓
不墜耳煩鉦鼓心說文字虎穴之中生此騏驥大和紀元滄景不度子弄父兵
跳踉海壖有鄰陰交蝟起雞連詔下薄伐良隅騷然時惟侍中實統魏師蓄銳
未發衆心危疑僕射爲子陳謀盡詞興言涕零有感尊慈絕姻效節精貫神祇
滄波底寧王師褻之乃遷元侯來鎮近畿乃胙元子別建旌麾一門四節焜燿
當時倏忽變生魏郊紛披喬木雖大盲風不知干雲之臺列缺焚之哀哀孝嗣
丁此大酷迎護幃輜葬于東洛訴天觸地血染縷服禮有金革詔書敦促不遂
枕戈驟膺推轂雕陰白馬暨于邠谷雖榮三鎮不荷百祿綺紈之閒珪組纍纍
如彼晨葩日中而萎有妻名家有子穉齒行號執禮歸窆蒿里洛水之陽循邛
之趾昭尊穆敬幽顯同理舊松新柏亦象橋梓刻石紀功垂于萬祀

劉賓客文集卷第三

...

...

...

...

...

...

...

...

...

...

...

劉賓客文集卷第四

碑下 釋門銘記附

曹溪第六祖大鑒禪師第二碑

佛衣銘 并引

唐故衡嶽大師湘潭唐興寺儼公碑

牛頭山第一祖融大師新塔記

袁州萍鄉縣楊岐山故廣禪師碑

夔州始興寺移鐵像記

毗盧遮那佛華藏世界圖讚

成都府新修福成寺記

大唐曹溪第六祖大鑒禪師第二碑

元和十一年某月日詔書追褒曹溪第六祖能公諡曰大鑒實廣州牧馬總以

疏聞絲是可其奏尙道以尊名同歸善善不隔異教一字之褒華夷孔懷得其

所故也馬公敬其事且謹始以垂後遂咨於文雄今柳州刺史河東柳君爲前碑後三年有僧道琳率以其徒由曹溪來且曰願立第二碑學者志也維如來滅後中五百歲而摩騰竺法蘭以經來華人始聞其言猶夫重昏之見芻爽後五百歲而達摩以法來華人始傳其心猶夫昧旦之覩白日自達摩六傳至大鑿如貫意珠有先後而無同異世之言真宗者所謂頓門初達摩與佛衣俱來得道傳付以爲真印至大鑿置而不傳豈以是爲筌蹄邪芻狗邪將人人之莫己若而不若置之邪吾不得而知也按大鑿生新州三十出家四十七年而沒百有六年而謚始自蘄之東山從第五師得授記以歸高宗使中貴人再徵不奉詔第以言爲貢上敬行之銘曰

至人之生無有種類同人者形出人者智蠢蠢南裔降生傑異父乾母坤獨肖元氣一言頓悟不踐初地五師相承授以寶氣宴坐曹溪世號南宗學徒爰來如水之東飲以妙藥差其瘖聾詔不能致許爲法雄去佛日遠羣言積億著空執有各走其域我立真筌揭起南國無脩而脩無得而得能使學者還其天識

如黑而迷仰見斗極得之自然竟不可傳口傳手付則礙於有留衣空堂得者
天授

佛衣銘

并引

吾既爲僧琳撰曹溪第二碑且思所以辯六祖置衣不傳之旨作佛衣銘曰
佛言不行佛衣乃爭忽近貴遠古今常情尼父之生土無一里夢奠之後履存
千祀惟昔有梁如象之狂達摩救世來爲醫王以言不痊因物乃遷如執符節
行乎復關民不知官望車而畏俗不知佛得衣爲貴壞色之衣道不在茲由之
信道所以爲寶六祖未彰其出也微既還狼荒憬俗蚩蚩不有信器衆生曷歸
是開便門非止傳衣初必有終傳豈無已物必歸盡衣胡久恃先終知終用乃
不窮我道無朽衣於何有其用已陳孰非芻狗

唐故衡嶽大師湘潭唐興寺儼公碑

佛法在九州閒隨其方而化中夏之人汨於榮破榮莫若妙覺故言禪寂者宗
嵩山北方之人銳以武攝武莫若示現故言神通者宗清涼山南方之人剽而

輕制輕莫若威儀故言律藏者宗衡山是三名山爲莊嚴國必有達者與山比
崇南嶽律門以津公爲上首津之後雲峰證公承之證之後湘潭儼公承之星
月麗天珠璣同貫由其門者爲正法焉公號智儼曹氏子世爲郴之右姓兆形
在孕母不嗜葷成童在侶獨不嗜戲其夙植固厚者歟生九年樂爲僧父不能
奪其志抱經笥入峒嶺山從名師執業凡進品受具聞經傳印皆當時大長老
我入明門不住諸乘我行覺路徑入智地居室方丈名聞大千護法大臣多所
賓禮嗣曹王皋之鎮湖南請爲人師自是登壇莅事三十有八載由我得度者
萬有餘人人持寶衣解瓔珞爲禮公色受之謂門弟子曰彼以有相求我我以
有爲應之凡建寶幢修廢寺飾大像皆極其工應物故也元和十三年九月二
十七日中夜具湯沐剃頤頂與門人告別卽寂而視身與色無有壞相嗚呼豈
生能全吾真故死不速朽將有願力邪余不得而知也問年八十二問臘六十
一葬于寺東北隅傳律弟子中巽道準傳經弟子圓皎貞璨與其徒圓靜文外
惠榮明素存政等欲其師之道光且遠故咨予乞詞乃作長句偈以銘之曰

祝融靈山禹所治非夫有道不可止中有毗尼出塵士以津視儼猶孫子登壇
人師四十祀南方學徒宗奧旨幼無童心至兒齒識滅形全異凡死長沙潭西
幾五里陶侃故居石頭寺門前一帶湘江水吁嗟律席之名兮與湘流而不已
牛頭山第一祖融大師新塔記

初摩阿迦葉授佛心印得其人而傳之至師子比丘凡二十五葉而達摩得焉
東來中華華人奉之爲第一祖又三傳至雙峰信公雙峯廣其道而岐之一爲
東山宗能秀寂其後也一爲牛頭宗巖持威鶴林徑山其後也分慈氏之一支
爲如來之別子咸有祖稱粲然貫珠大師號法融姓章氏延陵人少爲儒博極
羣書旣而歎曰此仁誼言耳吾志求出世闕法遂入句曲依僧旻改逢掖而緇
之徙居是山宴坐石室以慧力感通故旱麓泉涌以神功示現故皓雪蓮生巨
蛇摧伏羣鹿聽法貞觀中雙峯過江望牛頭頓錫曰此山有道氣宜有得之者
乃來果與大師相遇性合神授至于無言同躋智地密付貞印揭立江左名聞
九圍學徒百千如水歸海由其門而爲天人師者皆脈分焉顯慶二年報身不

滅道在後覺神依故山戒香不絕龕坐未飾夫豈不思乎蓋神期冥數必有所待太和三年潤州牧浙江西道觀察使檢校禮部尚書趙郡李公在鎮三閩百爲大備尚理信古儒玄交脩始下令禁桑門皈佛以眩人者而於真實相深達焉常謂大師像設宜從本教言自我啓因自我成乃召主吏籍我月日得緡錢二十萬俾秣陵令如符經營之三月甲子新塔成事嚴而工人盡藝誠達而山神來護願力旣從衆心知歸撞鐘告白龍象大會諸天聲香之蘊如見如聞卽相生敬明幽同感尚書欲傳信于後遠命愚志之夫上士解空而離相中士著空而嫉有不因相何以不覺不由有何以悟無彼達真諦而得中道者當知爲而不有賢乎以不脩爲無爲也

袁州萍鄉縣楊岐山故廣禪師碑

天生人而不能使情欲有節君牧人而不能去威勢以理至有乘天工之隙以補其化釋王者之位以遷其人則素王立中樞之教懋建大中慈氏起西方之教習登正覺至哉乾坤定位有聖人之道參行乎其中亦猶水火異氣成味也

同德輪轅異象致遠也同功然則儒以中道御羣生罕言性命故世衰而寢息佛以大悲救諸苦廣啓因業故劫濁而益尊自白馬東來而人知象教佛衣始傳而人知心法弘以權實示其攝脩味真實者卽清淨以觀空存相好者怖威神而遷善厚於求者植因以覲福懼於苦者證業以銷冤革盜心於冥昧之閒泯愛緣於生死之際陰助教化總持人天所謂生成之外別有陶冶刑政不及曲爲調柔其方可言其旨不可得而言也惟四海之大羣倫之富必有以得其門而會其宗者爲世導師焉禪師諱乘廣其生容州姓張氏七歲尙儒以俎豆爲戲十三慕道遵壞削之儀至衡陽依天柱想公以啓初地至洛陽依荷澤會公以契真乘洪鐘蘊聲扣之斯應陽燧含燄晞之乃明始由見性終得自在常謂機有淺深法無高下分二宗者衆生存頓漸之見說三乘者如來開方便之門名自外得故生分別道由內證則無異同遂以攝化爲心經行不倦愍彼南裔不聞佛經由是結廬此山心與境寂應念以起教隨方而立因居涉旬而善根者知歸逮周月而帶縛者漸悟以月倍日以年倍時瘖矇洞開荒憬潛革邑

中長者十方善衆咸發信願大其藩垣法堂四阿服引僧舍身心恆寂象馬交馳墮其去來皆得利益踰嶺之北涉湘而南仰茲高山知道有所在此地緣盡脩然化俱神歸佛境悲結人世自趺坐而滅至于茶毗三百有六旬矣爪髮加長容澤差衰真子號呼圍繞薪火得舍利如珠璣者數十百焉於戲肖圓方之形故寂滅以示盡入菩提之位故殊相以現靈亦猶鳳毛成字麟角生肉必有以異不知其然於是服勤聞法之上首曰甄升乃率其徒圓寂道弘如亮如海等相與拭淚具役建塔於禪室之右端從衆也初廣公始生之辰歲在丁巳當玄宗之中元生三十而受具更臘五十二而終終之夕歲直戊寅當德宗之後元三月既望之又十日也後九年其門人還源以爲崇塔以存神與建銘以垂休皆憑像寄懷不可以闕一謬謂余爲習於文者故繭足千里以誠相攻夫懼其先師德音與時寢遠且曰白月中黑東川無還颺于金石傳信百劫彼墮淚之感豈儒家者流專之敬酬斯言銘示真俗文曰

如來說法偏滿大千得勝義者強名爲禪至道不二至言無辯心法東行羣迷

不變七葉無詞四魔潛扇佛衣生塵佛法如綫吾師覺者冥極道樞承受密印
端如貫珠一室寥然高山之隅爲法來者千百人俱裔民嚙嚙戶有犀渠攝以
方便家藏佛書願力旣普度門斯盛合爲一乘散爲萬行卽動求靜故能常定
絕緣離覺乃得究竟生非我樂死非我病現滅者身常圓者性本無言說付囑
其誰等空無礙後覺得之像闕虛塔迹留仁祠十方四輩瞻禮於斯

夔州始興寺移鐵像記

佛薪盡于乾竺而象教東行是法平等故所至爲淨土是身應供故隨念如降
生先是魚復人有以利金爲彌勒像者重千鈞晬容瑞相人天兩足魯氏卒事
而他工未備故寓于西偏不知其幾年矣寺僧法照瞻禮發信赤肩白足入諸
大城乃至聚落無空過者積十餘年得信財無量絲是購工以嘗巧募徒而畢
力四輩增增工麾以肱中樞外脈陰轉陽動凝如地踴岌如山行大匠無言尊
容嚮明青蓮承趺金獸捧持藻井花鬘蔥蘢四垂邑人膜拜於佛出世法照以
願力能就泣于佛前因持片石乞詞以示後按此寺始於宇文周初瀕江埠庫

皇唐神龍中爲水所壞有波那賴耶國僧廣照浮海而至頓錫不去遂移於今道場山曰磨刀嶺曰虎岡其經始與克脩皆蕃僧是力後之有志者豈無人哉法照夔人姓穆氏年十有五出家依江陵名僧受具肇自貞元二十年甲申歸此寺願崇建有爲凡脩大殿立菩薩大弟子侍佛左右逮長慶癸卯有成其善植德本者歟

毗盧遮那佛華藏世界圖讚

佛說華嚴經直入妙覺不由諸乘非大圓智不能信解德宗朝有龍象觀公能於是經了第一義居上都雲華寺名聞十方沙門嗣肇是其上足以經中九會纂成華藏俾人瞻禮卽色生敬因請余讚之卽說讚曰
清淨不染花中蓮捧持世界百億千湧出香海浩無邊風輪負之晝夜旋大雄九會化諸天釋梵八部來森然從昏至覺不依緣初初極極性自圓寫之綃素色相全是色非色言非言

成都府新修福成寺記

益城右門銜大達坦然西馳曰石筍街街之北有仁祠形焉直啓曰福成寺寺之殿臺與城之樓交錯相輝繡于碧霄望之如崑閬閒物太和四年蜀帥非將材不修邊備南詔君長謀得內空乘隙全入鬪于城下或縱火以駭衆此寺乃焚高門脩廊委爲寒燼如是者再歲帝念坤維丞相復來山川如迎父老相識環視故地寺爲焦墟載興起廢之歎爰有植因之願乃命主俸吏以吾緡錢三十萬爲經營之基自公來思蜀號無事時康歲稔人樂檀施公言旣先應如決川乃傾囊楮乃出懷袖勝因化愚慧力攝慳男奔女驟急於徵令匠者度材以指衆徒藝者運思以役衆技斤鋸磨礪丁丁登登陶者儲精巧者效能斂自火宅復爲金繩治故鼎新因毀成妍華夷縱觀萬目同聳旣告訖役公來慶成雲鮮日潤輝映前後於是都人舞抃而謠曰昔公去此福成以燬今公重還福成復完民安軍治亦如此寺庸可勿紀乎公實聞斯言遂折簡見命謹月而日之時太和某年某月日大檀越具官封爵段氏其他發大願者程功董事者自中貴人及賓寮將吏若僧徒僭籍之而刻于石

劉賓客文集卷第四

劉賓客文集卷第四
 一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

劉賓客文集卷第五

古論上

辯迹論一首

明贄論一首

華佗論一首

其天說柳宗元

天論上一首

天論中一首

天論下一首

辯迹論一首

客有能通本朝之雅故者曰時之污崇視輔臣之用房與杜迹何觀焉建官取

士之制地征口賦之令禮樂刑法之章因隋而已矣二公奚施為余愀然曰三

王之道猶夫循環非必變焉審所當救而已隋之過豈制置名數之閒邪顧名

與事乖耳因之何害焉夫上材之道非務所舉必的然可使戶曉為迹也吾觀

梁公之迹章章如懸寓矣曷然哉請借一以明之史不云乎初太宗怒渾戎之

橫于塞也度諸將不足以必取當守而歎曰得李靖為帥快哉靖時告老且病

矣梁公虛其心以起之靖忘老與病一舉虜其君郡縣其地而還夫非伐國之

難能起靖之難能也靖非不克之爲慮居功之爲慮也古之爲將度柄輕不足以遂事重則嫌生焉是以有辭第以見志有多產以取信有子質以滅貳有璧監以虞謗其多患也如是若靖者名既成位既崇重失畏偏其患又甚焉微梁公之能盡材能捍患能去忌能照私彼姑藉舊勞居素貴足矣惡乎起哉夫豈感空言而起邪心相見久矣夫豈飾小信而要邪道相籠久矣其後敬玄擅能失材臣而敗隨之林甫自便進蕃將而亂隨之由是而言固相萬矣子方規規然窺上材以戶曉之迹此吾之所不取也若杜萊公者在相位日淺將史失其傳然以梁公之鑒裁自天策府遂以王佐材許之則是又能以道籠房公者矣房之許與迹孰甚焉客無以應而作子劉子曰觀書者當觀其意慕賢者當慕其心循迹而求雖博寡要信矣

論十一首

天論中一首

明贄論首

即贄論一首

華論論一首

古之人動必有以將意故贄之道自天子達焉夫芬芳在上臭達于下而溫粹無擇有似乎聖人者鬯也故用於天子清越而瓊不自揜潔白而物莫能污內

堅剛而外溫潤有似乎君子者玉也故用乎諸侯執之不鳴刑之不噪似死義
乳必能跪似知禮者羔也故卿執焉在人之上而有先後行列者雁也故大夫
執焉耿介而一志者雉也故士執焉視其所執而知其任是故食愈重而志愈
卑位彌尊而道彌廣耿介之志唯士得以行之何也務細而所試者寡齒卑而
所蔽者衆言未足以動聽故必激發以取異行未足以應遠故必砥礪以沽聞
借令由士爲大夫捨雉而執雁其志也隨之故耿介之名不施於大夫矣況其
上乎然則爲士也不思雉之介爲卿也能思羔之禮歟今夫或者不明分推理
而觀之則曰此居下而嗜直者是必得志而稔其訐矣彼當介而務弘者是必
處高而肥其德矣曾不知訐當其分則地易而自遷弘非其所則志遠而無制
矣於戲責士以卿大夫之善猶諭君以士之行耳予以執贄之道得其分苟推
分明矣求刑賞之僭濫得乎

華佗論

史稱華佗以恃能厭事爲曹公所怒荀文若請曰佗術實工人命繫焉宜議能

以宥曹公曰憂天下無此鼠輩邪遂考竟佗至蒼舒病且死見賢偏醫不能生

始有悔之之歎嗟乎以操之明略見幾然猶輕殺材能如是文若之智力地望

以的然之理攻之然猶不能返其恚執柄者之恚真可畏諸亦可慎諸原夫史

氏之書于冊也是使後之人寬能者之刑納賢者之諭而懲暴者之輕殺故自

恃能至有悔悉書焉後之惑者復用是爲口實悲哉夫賢能不能無過苟實于

理矣或必有寬之之請彼壬人皆曰憂天下無材邪曾不知悔之日方痛材之

不可多也或必有惜之之歎彼壬人皆曰譬彼死矣將若何曾不知悔之日方

痛生之不可再也可不謂大哀乎夫以佗之不宜殺昭昭然不可言也獨病夫

史書之義是將推此而廣耳吾觀自曹魏以來執死生之柄者用一恚而殺材

能衆矣又烏用書佗之事爲嗚呼前事之不忘期有勸且懲也而暴者復藉口

以快意孫權則曰曹孟德殺孔文舉矣孤於虞翻何如而孔融亦以應泰山殺

孝廉自譬仲謀近霸者文舉有高名猶以可懲爲故事矧他人哉

天說

柳宗元

韓愈謂柳子曰若知天之說乎吾爲子言天之說今夫人有疾痛倦辱飢寒甚者因仰而呼天曰殘民者昌佑民者殃又仰而呼天曰何爲使至此極戾也若是者舉不能知天夫果蓏飲食旣壞蟲生之人之血氣敗逆壅底爲癰瘍疣贅瘻痔蟲生之木朽而蝎中草腐而螢飛是豈不以壞而後出邪物壞蟲由之生元氣陰陽之壞人由之生蟲之生而物益壞食齧之攻穴之蟲之禍物也滋甚其能去之者有功於物者也蕃而息之者物之讎也人之壞元氣陰陽也亦滋甚墾原田伐山林鑿泉以井飲窳墓以送死而又穴爲堰洩築爲牆垣城郭臺榭觀游疏爲川瀆溝洫陂池燧木以燔革金以鎔陶甄琢磨悴然使天地萬物不得其情倖倖衝衝攻殘敗撓而未嘗息其爲禍元氣陰陽也不甚於蟲之所爲乎吾意有能殘斯人使日薄歲削禍元氣陰陽者滋少是則有功於天地者也蕃而息之者天地之讎也今夫人舉不能知天故爲是呼且怨也吾意天聞其呼且怨則有功者受賞必大矣其禍焉者受罰必大矣子以吾言爲何如柳子曰子誠有激而爲是邪則信辯且美矣吾能終其說彼上而玄者世謂之天

下而黃者世謂之地渾然而中處者世謂之元氣寒而暑者世謂之陰陽是雖大無異果瓠癰痔草木也假而有能去其攻穴者是物也其能有報乎蕃而息之者其能有怒乎天地大果瓠也元氣大癰痔也陰陽大草木也其烏能賞功而罰禍乎功者自功禍者自禍欲望其賞罰者大謬呼而怨欲望其哀且仁者愈大謬子而信子之仁義以遊其內生而死耳烏置存亡得喪於果瓠癰痔草木邪

天論上

世之言天者二道焉拘於昭昭者則曰天與人實影響禍必以罪降福必以善來窮阨而呼必可聞隱痛而祈必可答如有物的然以宰者故陰陽之說勝焉泥於冥冥者則曰天與人實刺音異霆震于畜木未嘗在罪春滋乎堇荼未嘗擇善跼蹐焉而遂孔顏焉而厄是茫乎無有宰者故自然之說勝焉余之友河東解人柳子厚作天說以折韓退之之言文信美矣蓋有激而云非所以盡天人之際故余作天論以極其辯云大凡入形器者皆有能有不能天有形之大

者也人動物之尤者也天之能人固不能也人之能天亦有所不能也故余曰天與人交相勝耳其說曰天之道在生植其用在強弱人之道在法制其用在是非陽而阜生陰而肅殺水火傷物木堅金利壯而武健老而耗耗氣雄相君力雄相長天之能也陽而藝樹陰而擊斂防害用濡禁焚用光斬材竅堅液礦剛銜義制強訐禮分長幼右賢尙功建極閑邪人之能也人能勝乎天者法也法大行則是爲公是非爲公非天下之人蹈道必賞違之必罰當其賞雖三旌之貴萬鍾之祿處之咸曰宜何也爲善而然也當其罰雖族屬之夷刀鋸之慘處之咸曰宜何也爲惡而然也故其人曰天何預乃事邪唯告虔報本肆類授時之禮曰天而已矣福兮可以善取禍兮可以惡召奚預乎天邪法小弛則是非駁賞不必盡善罰不必盡惡或賢而尊顯時以不肖參焉或過而僂辱時以不辜參焉故其人曰彼宜然而信然理也彼不當然而固然豈理邪天也福或可以詐取而禍亦可以苟免人道駁故天命之說亦駁焉法大弛則是非易位賞恆在佞而罰恆在直義不足以制其強刑不足以勝其非人之能勝天之具

盡喪矣夫實已喪而名徒存彼昧者方挈挈然提無實之名欲抗乎言天者斯數窮矣故曰天之所能者生萬物也人之所能者治萬物也法大行則其人曰天何預人邪我蹈道而已法大弛則其人曰道竟何爲邪任人而已法小弛則天人之論駁焉今以一己之窮通而欲質天之有無惑矣余曰天恆執其所以臨乎下非有預乎治亂云爾人恆執其所以仰乎天非有預於寒暑云爾生乎治者人道明咸知其所自故德與怨不歸乎天生乎亂者人道昧不可知故由人者舉歸乎天非天預乎人爾善而歸於善其歸與否與天論之

天論中 公景非 公非天 不入 論 文 賞 聖 文 陽 富 其 賞 輿 三 載

或曰子之言天與人交相勝其理微庸使戶曉盍取諸譬焉劉子曰若知旅乎夫旅者羣適乎莽蒼求休乎茂木飲乎水泉必強有力者先焉否則雖聖且賢莫能競也斯非天勝乎羣次乎邑郭求蔭于華榭飽于餼牢必聖且賢者先焉否則強有力莫能競也斯非人勝乎苟道乎虞芮雖莽蒼猶郭邑然苟道乎匡宋雖郭邑猶莽蒼然是一日之途天與人交相勝矣吾固曰是非存焉雖在野

人理勝也是非亡焉雖在邦天理勝也然則天非務勝乎人者何哉人不宰則歸乎天也人誠務勝乎天者何哉天無私故人可勝乎天也吾於一日之途而明乎天人取諸近也已或者曰若是則天之不相乎人也信矣古之人曷引天爲答曰若知操舟乎夫舟行乎濼溜伊洛者疾徐存乎人次舍存乎人風之怒號不能鼓爲濤也流之湔洄不能峭爲鬼也適有迅而安亦人也適有覆而膠亦人也舟中之人未嘗有言天者何哉理明故也彼行乎江河淮海者疾徐不可得而知也次舍不可得而必也鳴條之風可以沃日車蓋之雲可以見怪恬然濟亦天也黯然沈亦天也阽危而僅存亦天也舟中之人未嘗有言天者何哉理昧故也問者曰吾見其駢焉而濟者風水等耳而有沈有不沈非天曷司歟答曰水與舟二物也夫物之合併必有數存乎其閒焉數存然後勢形乎其閒焉一以沈一以濟適當其數乘其勢耳彼勢之附乎物而生猶影響也本乎徐者其勢緩故人得以曉也本乎疾者其勢遽故難得以曉也彼江海之覆猶伊溜之覆也勢有疾徐故有不曉耳問者曰子之言數存而勢生非天也

天果挾於勢邪答曰天形恆圓而色恆青周迴可以度得晝夜可以表候非數之存乎恆高而不卑恆動而不已非勢之乘乎今夫蒼蒼然者一受其形于高大而不能自還於卑小一乘其氣于動用而不能自休於俄頃又惡能逃乎數而越乎勢邪吾固曰萬物之所以為無窮者交相勝而已矣還相用而已矣天與人萬物之尤者耳問者曰天果以有形而不能逃乎數彼無形者子安所寓其數邪答曰若所謂無形者非空乎空者形之希微者也為體也不妨乎物而為用也恆資乎有必依於物而後形焉今為室廬而高厚之形藏乎內也為器用而規矩之形起乎內也音之作也有大小而響不能踰表之立也有曲直而影不能踰非空之數歟夫目之視非能有光也必因乎日月火炎而後光存焉所謂晦而幽者目有所不能燭耳彼狸狴犬鼠之目庸謂晦為幽邪吾固曰以目而視得形之粗者也以智而視得形之微者也烏有天地之內有無形者邪古所謂無形蓋無常形耳必因物而後見耳烏能逃乎數邪

或曰古之言天之曆象有宣夜渾天周髀之書言天之高遠卓詭有鄒子今子之言有自乎答曰吾非斯人之徒也大凡入乎數者由小而推大必合由人而推天亦合以理揆之萬物一貫也今夫人之有頭目耳鼻齒毛頤口百骸之粹美者也然而其本在乎腎腸心腹天之有三光懸寓萬象之神明者也然而其本在乎山川五行濁爲清母重爲輕始兩位既儀還相爲庸噓爲雨露噫爲雷風乘氣而生羣分彙從植類曰生按尙書傳云海隅蒼生謂草木也動類曰蟲倮蟲之長爲智最大能執人理與天交勝用天之利立人之紀紀綱或壞復歸其始堯舜之書首曰稽古不曰稽天幽厲之詩首曰上帝不言人事在舜之進元凱舉焉曰舜用之不曰天授在殷中宗襲亂而興心知說賢乃曰帝賚堯民之餘難以神誣商俗已訛引天而毆由是而言天預人乎

劉賓客文集卷第五

劉賓客文集卷第六

論中

因論七篇

劉子閒居作因論或問其旨曷歸歟對曰因之爲言有所自也夫造端乎無形垂訓於至當其立言之徒放詞乎無方措旨於至適其寓言之徒蒙之智不逮于是造形而有感因感而有詞匪立匪寓以因爲目因論之旨也云爾

鑒藥 訊吐 數牛 傲舟 原力 說驥 述病

鑒藥

劉子閒居有負薪之憂食精良弗知其旨血氣交沴煬然焚如客有謂子子病病積日矣乃今我里有方士淪跡於醫厲者造焉而美肥輒者造焉而善馳矧常病也將子詣諸子然之之醫所切脈觀色聆聲參合而後言曰子之病其與居之節舛衣食之齊去聲乖所由致也今夫藏鮮能安穀府鮮能母氣徒爲美疾之囊囊耳我能攻之乃出藥一丸可兼方寸以授予曰服是足以淪昏煩而鉏

蘊結銷壘慝而歸耗氣然中有毒須其疾瘳而止過當則傷和是以微其齊也
予受藥以餌過信而駸能輕痺能和涉旬而苛癢絕焉抑搔罷焉踰月而視分
纖聽察微蹈危如平嗜糲如精或聞而慶予且闕言曰子之獲是藥幾神乎誠
難遭已顧醫之態多嗇術以自貴遺患以要財盍重求之所至益深矣予昧者
也泥通方而狃旣效猜至誠而惑勦說卒行其言逮再餌半旬厥毒果肆岑岑
周體如疔作焉悟而走諸醫醫大吒曰吾固知夫子未達也促和蠲毒者投之
濱於殆而有喜異日進和藥乃復初劉子慨然曰善哉醫乎用毒以攻疹用和
以安神易則兩躡明矣苟循往以御變昧於節宣奚獨吾儕小人理身之弊而
已

訊吐

劉子如京師過徐之右鄙其道旁午有吐增增扶斑白挈羈角齋生器荷農用
摩肩而西僕夫告予曰斯宋人梁人亳人潁人之逋者今復矣予愕而訊云予
聞隴西公暘轂之止方踰月矣今爾曹之來也欣欣然似恐後者其聞有勞徠

之簿歟蠲復之條歟振贍之格歟碩鼠亡歟瘠狗逐歟曰皆未聞也且夫浚都
吾政之上游也自巨盜閒釁而武臣顛焉牧守由將校以授皆虎而冠子男由
胥徒以出皆鶴而軒故其上也子視卒而芥視民其下也驚其理而蚩其賦民
弗堪命是軼于他土然咸重遷也非阡危擠壑不能違之曩者雖歸歟成謠而
故態相沿莫我敢復今聞吾帥故爲丞相也能清靜畫一必能以仁蘇我矣其
佐嘗宰京邑也能誅鉏豪右必能以法衛我矣奉斯二必而來歸惡待事實之
及也子因浩歎曰行積於彼而化行於此實未至而聲先馳聲之感人若是之
速歟然而民知至至矣政在終終也嘗試論聲實之先後曰民黠政頗須理而
後勸斯實先聲後也民離政亂須感而後化斯聲先實後也立實以致聲則難
在經始由聲以循實則難在克終操其柄者能審是理俾先後終始之不失斯
誘民孔易也

歎牛

劉子行其野有叟牽跛牛于蹊偶問焉何形之塊歟何足之病歟今齧棘然將

安之歟叟攬縻而對云瑰其形飯之至也病其足役之過也請爲君畢詞焉我
傲車以自給嘗驅是牛引千鈞北登太行南至商嶺掣以回之叱以聳之雖涉
淖躋高轂如蓬而轉不償及今廢矣顧其足雖傷而膚尙腴以畜豢之則無用
以庖視之則有羸伊禁焉莫敢尸也甫聞邦君饗士卜剛日矣是往也當要
售於宰夫余尸之曰以叟言之則利以牛言之則悲若之何予方竄且無長物
願解裘以贖將置諸豐草之鄉可乎叟輒然而哈曰我之沽是屈指計其直可
以持醪而齧肥飴子而衣妻若是之逸也奚事裘爲且昔之厚其生非愛之也
利其力今之致其死非惡之也利其財子惡乎落吾事劉子度是叟不可用詞
屈乃以杖扣牛角而歎曰所求盡矣所利移矣是以員能霸吳屬鏤賜斯旣帝
秦五刑具長平威振杜郵死垓下敵擒鍾室誅皆用盡身賤功成禍歸可不悲
哉可不悲哉嗚呼執不匱之用而應夫無方便時宜之莫吾害也苟拘於形器
用極則憂明已

劉子浮于汴涉淮而東亦既釋紼纒榜人告余曰方今湍悍而舟盥宜謹其具以虞焉予聞言若厲絲是裯以窒之灰以墮之斛以乾之僕怠而躬行夕惕而晝勤景霾晶而莫進風異響而遽止兢兢然累辰是用獲濟偃檣弭櫂次于淮陰於是舟之工咸沛然自暇自逸或游肆而觴矣或拊橋而歌矣隸也休役以高寢矣吾曹無虞以宴息矣逮夜分而竅隙潛澍渙然陰潰至乎淹簣濡薦方卒愕傳呼跣跳登墟僅以身脫目未及瞬而樓傾軸墊抵于泥沙力莫能支也劉子缺然自視而言曰彘子兢惕也汨洪漣而無害今予宴安也蹈常流而致危畏之途果無常所哉不生於所畏而生於所易也是以越子膝行吳君忽晉宣戶居魏臣怠白公厲劍子西晒李園養士春申易至于覆國夷族可不儆哉嗚呼禍福之胚胎也其動甚微倚伏之矛盾也其理甚明困而後儆斯弗及已

原力

劉子于邁舟次泗濱維紵邇之于傳傳吏適傳呼曰乘驛者方來誰何之則曰力人也雅以力聞于吳楚閩中貴人器之謂宜爲爪士獻言于上有旨趣如京

師頃其至則乞焉五輩咸碩其體毅其容動睛曄如曳趾岌如顧瞻遲回飲噉有聲泗濱守區由將授也說而勞之饗以太牢飲以百壺酒酣氣振求試自矜傍如無人中若有馮有盪舟如沿者扶鼎如飛者絢鍵如麻者開兩弧而脈不償者屣巨石而濟如流者異哉果以力駭世而聞于上也異日話於儒家者流有客悱然自奮曰斯誠力矣上之不過誇胡人而戲角抵次之不過倅期門而振袂服我之力異然以道用之可以格三苗而賓左衽以威用之可以係六羸而斷右臂由是而言彼力也長雄於匹夫然猶驛其駢餽其食我力也無敵於天下亦當蒲其輪鶴其書矣予詰之曰彼之力用於形者也子之力用於心者也形近而易見心遠而難明理乎而言則子之力大矣時乎而言則彼之力大矣且夫小大迭用曷常哉彼固有小矣子固有大矣子所不能齊也客於邑垂涕洟劉子解之曰屠羊于肆適味於衆口也攻玉于山俟知於獨見也貪日得則鼓刀利要歲計而韞櫝多客聞之破涕曰吾方俟多於歲計也歲數歲數其

我與歟

說驥

伯氏佐戎于朔陲獲良馬以遺予予不知其良也秣之稊秕飲之汚池廢櫪也上瘳而下蒸羈絡也綴索而續韋其易之如此予方病且窶求活于肆肆之馭亦不知其良也評其價六十緡將劑矣有裴氏子羸其二以求之謂善價也卒與裴氏裴所善李生雅挾相術於馬也尤工覩之周體怡然視所然笑既而抃隨之且曰久矣吾之不覩於是也是何柔心勁骨奇精妍態宛如鏘如擘如翔如之備邪今夫馬之德也全然矣顧其維駒藏銳于內且秣之乖方是用不說于常目須其齒備而氣振平聲則衆美灼見上可以獻帝閑次可以驚千金裴也聞言竦焉遂傲其僕蠲其阜筐其惡蚤其澣穉以美薦秣以薌粒起之居之澡之拒之無分陰之怠斯以馬養養馬之至分也居無何果以驥德聞客有唁予以喪其寶且譏其所貿也微予灑然曰始予有是馬也予常馬畜之今予易是馬也彼寶馬畜之寶與常在所遇耳且夫昔之翹陸也謂將蹄將齧抵以櫪策不知其籟雲耳昔之嘘吸也謂爲疵爲癘投以藥石不知其噴玉耳夫如是則

雖曠日歷月將至頓踣曾何寶之有焉絲是而言方之於士則八十其緡也不猶踰於五穀皮乎客謬而竦予遂言曰馬之德也存乎形者也可以目取然猶爲之若此矧德蘊于心者乎斯從古之歎予不敢歎

述病

劉子嘗涉暑而征熱攻于腠以致病其僕也告痛亦莫能興逮浹日子有瘳醫診之曰疾幸闕矣顧熱疹而未平有遺類焉宜謹於攝衛衛之乖方則病復矣所苦旣微而怠其說倦眠于衾而興焉倦隱于几而步焉面不能罷頰髮不能捐櫛口不能忘味心不能無思如是未移日而疾也疹

疎錦反

如復癢于躬進藥

求汗凡三渙然後目能視視旣分則嚮時之僕已睨然執柅圈侍予于前矣予訝而曰曩吾與若也病偕呻也諄也若酷而吾微藥也餌也吾殷而若薄何患之同而痊之異哉僕諄諄而答云己之被病也兀然而無知有闕也亦兀然而無知髮蓬如而忘乎亂面黔如而忘乎垢洎疾之殺也雖飲食是念無滑甘之思日致復初亦不知也予喟然歎曰始予有斯僕也命之理畦則蔬荒主庖則

味乖顛廢則馬瘠常謂其無適能適乃今以兀然而賢我遠甚利與鈍果相長
哉僕更矣劉子遂言曰樂於用則豫章貴厚其生則社櫟賢唯理所之曾何膠
於域也

劉賓客文集卷第六

卷之六

[Faint bleed-through text from the reverse side of the page, including characters like 卷之六 and 宋版印]

劉賓客文集卷第七

論下

辯易九六論

與董生言易

辯易九六論

乾之爻皆九而坤六何也世之儒曰吾聞諸孔穎達云陽尊得兼乎陰陰不得兼乎陽也它日子與董生言及易生曰吾聞諸畢中和云舉老而稱也請徵諸撰著夫端策者一變而遇少與歸奇而爲五再變而遇少與歸奇而爲四三變如之是老陽之數分措于指闕者十有三策焉其餘三十有六四四而運得九是已故易繫注云乾一爻三十六策也一變而遇多與歸奇而爲九再變而遇多與歸奇而爲八三變如之是老陰之數分措于指闕者二十有五策焉其餘二十有四四四而運得六是已故易繫注云坤一爻二十四策也借如一變而遇少再變三變而遇多是少陽之數分措于指闕者二十有一策其餘二十有八四四而運得七一變而遇多再變三變而遇少是少陰之數分措于指闕者

十有七策其餘三十有二四四而運得八故九與六為老老為變爻七與八為少少為定位故曰舉老而稱亦曰尚變而稱且夫筮為乾者常遇七斯乾矣常遇九斯得坤矣筮為坤者常遇八斯坤矣常遇六斯得乾矣在左氏國語有之晉公子親筮之曰尚有晉國得貞屯悔豫皆八八非變爻故不曰有所之按坎二世而為屯屯之六二為世爻震一世而為豫豫之初六為世爻屯之二豫之初皆少陰不變斯非八乎卦由老數而舉曰六筮由著數故斥曰八在左氏春秋傳有之曰穆姜薨于東宮始往而筮之遇艮之八史曰是謂艮之隨夫艮三三艮下之隨三三震下唯二不動斯遇八也餘五位皆九六故反焉筮法以少為卦主變者五而定者一故以八為占艮之六二曰艮其腓不拯其隨其心不快史以為東宮實幽也遇此為不利故從變爻而占苟以說于姜也何則卦以少為主若定者五而變者一即宜曰之某卦觀之否師之臨類是也變與定均即決以內外今變者五定者一宜從少占懼不吉而更之故曰是謂艮之隨是謂之云者苟以說也故穆姜終死于東宮與艮會耳而杜元凱於此注以為雜

用三易故有遇八之云非臻極之理也劉子曰余與董生言九六之義信與理會為不誣矣餘又於左氏二書參焉若合形影然而世人往往攘臂于其閒曰生之名孰與穎達著邪而材孰與元凱賢邪歷載曠日未嘗有聞人明是說者雖余憤然用口舌爭特貌從者什一二焉嗟乎由數立文所如皆合昭昭乎若觀三辰其不晦也如此然猶貴聽而賤視斷斷五然莫可更也矧無形之理不可見之道邪余獨悲而志之以俟夫後覺初董生言本畢中和中和本其師之學本一行云

第一指餘一益三餘二益二第二指餘一益二餘二益一第三指與第二

右揲著數卦從下起指亦自下始第一指法地故益成偶第二法天故益成奇第三人極法天故同

第一指遇一益三并掛一為五遇三遇二並謂之少與一同第二指遇一益二并掛一為四第三指遇一益二并掛一為四

右三指俱遇少通計十三策其餘三十六策四四運之得九為老陽故

易繫云乾之策二百一十有六注云陽爻九一爻三十六策六爻二百

一十有六

第一指遇四益四與掛一爲九 第二指遇四益三與掛一爲八遇三亦同 第三指遇四益三與掛一爲八遇三亦同

右三指俱遇多通計二十五策其餘二十四策四四運之得六爲老陰故

易繫云坤之策百四十有四謂陰爻六一爻二十四策六爻一百四十有

四

第一指遇一益三并掛一爲五 第二指遇四益三并掛一爲八 第三指遇四益三并掛一爲八

右初指少第二第三指多以少爲主通計二十一策其餘二十八策四四

運之得七爲少陽

第一指遇四益四并掛一爲九 第二指遇一益二并掛一爲四 第三指遇一益二并掛一爲四

右初指多第二第三少以多爲主通計一十七策其餘三十二策四四而

運得八爲少陰

第一指遇多謂四四也並止於九 第二指遇少謂一二也並止於四 第三指遇多謂三四也並止於八

右初指多第二指少第三指又多以少爲主通計二十一策其餘二十八

策四四而運得七爲少陽

第一指也並止於五第二指也並止於八第三指也並止於四

右初指少第二指多第三指又少以多為主通計一十七策其餘三十二

策四四而運得八為少陰

第一指也止於九第二指也止於八第三指也止於四

右初指第二指並多第三指獨少以少為主通計二十一策其餘二十八

策四四運之得七為少陽

第一指也止於五第二指也止於四第三指也止於八

右初指二指並少三指獨多以多為主通計一十七策其餘三十二策四

四運之得八為少陰

穆姜薨于東宮始往而筮之遇艮之八史曰是謂艮之隨夫艮艮上之隨

三三兌上唯六二爻不動餘五盡變者遇九六也二不動者遇八也

晉公子親筮之曰尚有晉國得貞屯悔豫皆入夫屯三三震下六位盡不遇六

九故不動既無所之即以世爻為占按屯是坎宮二世卦故以一為占則遇八

夫豫三三三坤下震上是震宮一世卦以初六為占亦遇八韋昭於此注云內曰貞外

曰悔震下坎上為屯坤下震上為豫言得此兩卦震在屯為貞在豫為悔八謂

震兩陰爻在貞在悔皆不動所以筮史占之謂閉而不通者爻無為也乾之策

二百一十有六謂陽爻九一爻三十六策六爻當二百一十六言三十六者舉老陽也坤之策一百四十有四謂

爻六一爻二十四策六策當百四十有四言二十四者舉老陰也

凡三百有六十當蒼之日二篇之策萬有一千五百二十當萬物之數六十四

卦都三百六十四爻陰陽相半各一百九十二爻

陽爻一爻三十六策合為六千九百一十二陰爻一爻二十四策合為四千六

百八

右六九之數

一行大衍論云三變皆剛太陽之象也三變皆柔太陰之象也一剛二柔少陽

之象也一柔二剛少陰之象也少陽之剛有始有壯有究少陰之柔有始有壯

有究因綜四象之變而成八象焉八象之位而入卦之本列矣注云太陽始動

施于太陰而生震象之七謂少陽之七再動于壯而生坎象之七謂再索而三

動于究而生艮象之七謂三索而得男也太陰始動施于太陽而生巽象之八謂少陰之八為

巽初六再動于壯而生離象之八謂再索而得女也三動于究而生兌象之八謂三索而得女也

是以九六七八分為八象

右大衍論

國語又云董因迎公于河公問焉曰吾其濟乎對曰臣筮之得泰之八曰是謂天地配亨小往大來今及之矣何不濟之有韋昭云泰三至五震象為侯陰爻不動其數皆八與貞屯悔豫義同劉子曰昭此說用互體有震按董因之言天地配亨是六五帝乙歸妹以祉元吉之爻夫泰乾坤體全內外位正內為身外為事卜得國事也以外卦為占六五居尊位故統論卦下辭曰小往大來爻遇歸妹故曰天地配亨何必取互體也

右與董生言易

劉賓客文集卷第七

...

...

...

...

...

...

...

...

...

...

...

劉賓客文集卷第八

記上

天平軍節度使廳壁記

汴州刺史廳壁記

國學新修五經壁記

汴州鄭門新亭記

鄭州刺史東廳壁記

管城新驛記

和州刺史廳壁記

山南西道節度使廳壁記

山南西道新修驛路記

天平軍節度使廳壁記

元和十四年春二月王師平河南負固之地十有二州憲宗視地圖戶版俾參其地三月有詔其以曹濮隸鄆爲一隅按部三郡統兵三萬乃新其軍錫號天平蓋承天威以平暴悖志動揚休昔稱爲雄新邦始徠汚俗猶用朝廷革之以漸故命功臣或辨吏以帥焉太和三年冬天平監軍使以故侯病聞上方注意治本乃以牙璋玉節鼎右僕射官稱賜東都留守令狐公曰予擇文武惟汝兼

前年鎮汴州有顯庸往年弼憲宗有素貴徒得君重剛吾四支公西拜稽首登車有耀不踰旬抵治所夾清河而域之惟鄆州在春秋爲須句之國涉漢爲濟東蓋禹貢兗州之域宣精在上奎爲文宿畫野在下魯爲儒鄉故其人知書風俗信厚天寶末大憝起於幽都虜將因兵鋒取其地右勇左德積六十年公之來思如古醫之治劇病宣洩頤養氣還神復大凡抗詔條國式於身以先之示非約以裕人信賞罰以格物物力日完人風自移涉月報政踰年鼎治牙門之容暨暨而恭壘門之容仡仡而和里中之容闐闐而遂勞者以安去者以歸分星不搖田租降福凡革前非罷供第無名錢歲鉅萬菽粟如之錦繒且千兩去苛法急徵毀家償租之令故流庸自占四萬室衆無吁咨和氣乃來三田仍稔草木咸瑞豈偶爾哉初斯堂西墉有刺史記而元戎雄尊之位虛其左方豈有待邪公命愚志之俾來者仰公知變風之自太和五年夏四月二十六日記

汴州刺史廳壁記

本朝以浚儀爲汴州刺史治所自隋醜新渠吸黃河而東行州舍其樞爲天下

劇內屏王室東雄諸侯居無事常時帶廉察使兵興已還益以節旄用人得否繫國輕重長慶四年詔書命河南尹敦煌令狐公來莅來刺錫之介圭使印兵符汴人交賀肴醴騰貴惟是邦始都於魏惠王始郡於宇文周星躔回環天駟垂光地爲四戰故其俗右武人具五都故其氣習豪公自爲宰相時已熟四方之利病凡所戾止參然前知旣視事三日揖羣吏與之言曰吾食止圭田吾用止公入凡他給過制傷廉浼潔者悉罷之一歸乎公藏凡曲防苛禁不情乖體者悉刻之一出乎令典凡關征船算奪時專利者悉更之一遵乎詔條然後刑麗事而詳賞以時而均興學以勸藝示寬以化勇居數月而汴州人恂恂然無復故態明年大成議者若曰奕奕浚都國之咽喉咀清嚙和旁暢四支東夏黠馬由我以肥是浚之治非所澤於所履而已初公七代祖在隋爲納言大業中持節居此亦號刺史距今餘二百年公實能似旣拜闕發魚書合左右契由阼階躋遐踵前武歆然如聞其馨香肅然如覩其形容信乎君子之澤遠而有光輝也他日命遊梁客志之書於廳事謹按前賢之在此堂者張平原首之陸氏

撰節度使記揭於東壁詳矣今公命爲刺史記書於右端謹月而日之以公爲冠大和元年夏五月某日記

國學新修五經壁記

初大曆中名儒張參爲國子司業始定五經書於論堂東西廂之壁辯齊魯之音取其宜考古今之文取其正繇是諸生之師心曲學偏聽臆說咸束之而歸於大同揭揭高懸積六十歲崩剝污蟻泮然不鮮今天子尙文章尊典籍於苑囿不加尺椽而成均以治學上言遽賜千萬時祭酒皦實尸之博士公肅實佐之國庠重嚴過者必式遂以羨贏再新壁書懲前土塗不克以壽乃析堅木負墉而比之其制如版牘而高廣其平如粉澤而潔滑背施陰闕使衆如一附離之際無迹而尋堂皇靚深兩廡相照申命國子能通法書者分章揆日遜其業而繕寫焉筆削旣成讎校旣精白黑彬班瞭然飛動以蒙來求煥若星辰以敬來趨肅如神明以疑來質決若著蔡由京師而風天下覃及九譯咸知宗師非止服逢掖者鑽仰而已於是學官某等暨生徒凡四百二十有八人請金石刻

且歌之曰

我有學宇旣傾而成之我有壁經旣昧而明之孰規摹之孰發揮之祭酒維齊
博士維韋俾我學徒弦歌以時切切祁祁不敖不嬉庶乎適人來采我詩時余
爲禮部郎凡瞽宗之事得以關決故書之以移史官宜附於藝文云

汴州鄭門新亭記

亭於西門尊闕路也實相公以心規羣僚以辭叶而百工以樂成斧斤無聲丹
素有嚴主人肅客落以金石走鄭之門嶽爲石垣黃河一支滉漾北軒前瞻東
顧夔動軌直含景生姿邈空欲翔汴城具八方之人殊形詭言而耳目一說初
公來臨擁節及門馭吏曰此鄭州門公心非之若曰野哉居無何卽舊號而更
之曰鄭門故事王人大僚之去來元侯前驅翊門而旋率立馬塵盆中挹策爲
禮公心不然之乃下亭令於執事按亭東西函丈者三之有奇而南北五之有
贏樂縣宴豆前後以位棊闔對明弭掀順時修梁衡建中虛上荷圓脊方廉高
卑中經簾鑪茵帟文櫨皖榻儲以應猝周用而宜乃命尹闔視亭長抱關視掌

固啓閉拚除是謹是攷錫命賜胙勞迎贈餞我當躬行汝先汝蠲挾膳提醪生芻縞衣我寮展事靡問文武汝唯汝從凡入而脩容凡出而脩較褻襲威儀勿籍勿訶繇是貴人稱諸朝羣吏詠於家行者誇於道與人同其安者人人譯其聲而吟之始乎譏譏而成乎龐鴻欲無文字不可也公遂條白其所以然遠命學古者書之公姓令狐氏以文章典內外書命以蕃明登左右相以飛語策免以思材復徵自有浚師無如今治文武兩熾其古之大臣歟

鄭州刺史東廳壁記

古諸侯之居公私皆曰寢其他室曰便坐今凡視事之所皆曰廳其他室以辨方爲稱今年鄭州刺史楊君作東廳旣成而落之且以書抵余爲記按國章以甲乙第方域大凡環天子之居爲雄州鄭實邇王畿故望雄視其版多貴人且當大達故務劇君侯始來三日司稅掾舉七縣董租之吏累百君曰此百騰也悉罷之用戶符而輸入益辦司貢掾舉梨林之征請戶曉君曰盡弛之物籍用平賈而果益精里無吏迹民去痼疾授牘占租如臨詛盟土毛人力日夕相長

故周歲而完焉比年而愈肥雖軍興餽輓旁午大將牙旗往復相踵而里中清
夷雞犬音和人既寧而物有餘政既成而日多暇園視舊宇宜有以更之且書
得時亦以謹始因列名氏授受月而日之庶乎繼踐於茲者知貫珠之首其山
望澤漫土風吐俗與前賢之耿光備於正位有天寶中詞人杜顒之文在太和
四年某月日記

管城新驛記

太和二年閏三月滎陽守歸厚上言臣治所直天下大遠肘武牢而咽東夏誰
何宜謹啓閉宜度先是驛於城中駟遽不時四門牡鍵通夕弗禁請更於外隧
永永便安制曰可守臣奉詔無徵命無奪時糜羨財募游手逮八月既望新驛
成鄭人胥說琢石而紀曰在兌之方面玄負陽門銜周道牆蔭行粟境勝於外
也遠購名材旁延世工墜塗宣楮瓴壁剛滑術精於內也遽廬有甲乙牀帳有
冬夏庭容牙節廡臥囊橐示禮而不恩也內庖外廩高倉邃庫積薪就湯時芻
就燥有素而不愆也主吏有第役夫有區師行者有饗亭孥行者有別邸周以

高墉乃樓其門勞迎展蠲潔之敬餞別起登臨之思溱洧波瀾嵩丘雲煙四時萬象來覘於我走轂奔蹄遄征急宣入而忘勞出必屢顧其傳舍之尤乎太守姓楊氏字貞一華陰弘農人鄭爲雄州非聞人大吏不得在其選夫驛之宜遷於外也前此二千石嘗言之而重改作若貞一可謂果於從政而決行其言惜乎未施於大也

和州刺史廳壁記

歷陽古揚州之邑於天文直南斗魁下在春秋實句吳之封後爲楚所取秦并天下以隸九江而六爲九江治所晉平吳復隸淮南至永興初自析爲郡益之以烏江宋臺建目爲南豫州又益之以龍亢梁之亡北齊圖霸功擁貞陽侯以歸王僧辯來迎會於茲地二國和協故更名和州陳隋閒無所革國朝因隋武德中更龍亢爲含山初開元詔書以口算第郡縣爲三品是爲下州元和中復命有司參校之遂進品第一按見萬戶八千有奇輸緡錢十六萬歲貢織紵二筐吳牛蘇二鈞糝鱉九甕茅蒐七千兩鎮曰梁山浸曰歷湖田藝四穀麥全六

擾廬有旨酒庖有腴魚神仙故事在郊在藪玄元有臺彭鏗有洞名山曰雞籠
名塢曰濡須異有血閩祥有沸井城高而堅亞父所營州師五百環峙於東南
瀕江劃中流爲水疆揭旗樹纒十有六戍自孫權距陳出入六伐常爲宿兵之
地多以材能人處之本朝混一號爲善部然用人差輕非復曩時之比也始余
以尙書郎待謹刺連山今也由巴東來牧考前二邦之籍與版圖纔什五六而
地征三之究其所從來生植有本女工尙完堅一經一緯無文章交錯之奇男
夫尙墾闢功苦戀本無卽山近鹽之逸市無噉眩工無彫形無游人異物以遷
其志副徵令者率非外求凡百爲一出於農桑故也絲是而言瘠天下者其在
多巧乎寶曆元年六月二十一日刺史中山劉某記

山南西道節度使廳壁記

文皇帝初元始畫天下爲十道古荆梁之地舉曰山南厥後析爲東西天漢之
邦實居右部按梁州爲都督治所領十有五州縣道帶蠻夷山川扼隴蜀故二
千石有采訪防禦之名兵興多故其任益重澄清節鉞二柄兼委建中末德宗

南巡狩偃翠華而徘徊簫勺之音洽於巴漢戡難清宮六龍言旋乃下詔復除
征絲升州爲府等威班制與岐益同地既尊大用人隨異故自興元至太和五
十年閒以勳庸佩相印者三以薨明歷真相者九由台席授鉞未幾復入相者
再焉磊落震耀冠於天下去年夏四月今丞相趙郡公徵還泰階遂命左僕射
燉煌公往踐其武彘之九相及公而十焉初公自河陽節度使入操國柄其後
鎮宣武以禮悛獷悍治天下以清去培克居大鹵以仁蘇薦飢今來是都躡二
三大君子之躡道同氣協無所改更如鼓和琴布指成韻羌夷砥平旱麓發生
人無左言樂有夏聲俗既富庶居多閒暇園視府局素闕者補之先是公堂嘗
爲行殿人不敢斥別營侯居應門有闕棨戟未具公乃條白上言詔下有司可
其奏君門肅清方有眉目趨而入者聳然生敬焉惟梁山國也其節用虎出揚
其威入貯宜潔舊處仄陋黜其雄稜公遂分宅之別齋且據便地署曰節室卜
剛日乃遷焉敬君命而一民心軍中增氣而知禮戟衣既垂師節既嚴流眄屋
壁見前修之名氏列於坐右第以梁州刺史鼎興元尹記與今稱謂不合因發

函進牘於不佞且曰我已飾東壁以新志累子於是按南梁故事起自始登齋壇之後爲記云時開成二年歲在丁巳春二月某日記

山南西道新修驛路記

開成四年梁州牧缺上玩其印凝旒深思曰伊爾卿族歸氏以文儒再世居喉舌今天官二卿融能嗣其耿光嘗自內庭歷南臺尹轂下政事以試可爲元侯乃付印綬進秩大宗伯兼御史大夫玉節獸符鎮於媯墟公拜手稽首曰臣融敢揚王休於天漢之域旣蒞止咨於羣執事求急病者先之咸曰華陽黑水昔稱醜地近者嘗爲王所百態丕變人風邑屋與山水俱一都之會因爲善部矣唯駟遽之途敵危隘束其醜尙存使如周道在公頤指耳於是因年有秋因府無事軍逸農隙人思買餘乃懸墾山刊木之傭募其力揆鑽鑿撞秘之用庀其工具舁輦舂鍤之器膺其要鑿鼓以程之糗醪以犒之說使之令旣下奮行之徒塗集我之提封居右扶風觸劍閣千一百里自散關抵襄城次舍十有五牙門將賈黯董之自襄而南逾利州至於劍門次舍十有七同節度副使石文穎

董之兩將受命分曹星馳並山當蹊頑石萬狀坳者埕者兀者銛者磊落傾敲
波翻獸蹲熾炭以烘之巖醞以沃之潰為埃煤一簣可埽棧閣盤虛下臨敞呀
層崖峭絕柄木豆鐵因而廣之限以鉤闌狹逕深陁銜尾相接從而拓之方駕
從容急宣之騎宵夜不惑郟曲稜層一朝坦夷興役得時國人不知繇是駛行
者忘其勞吉行者徐其驅孳行者家以安貨行者肩不病徒行者足不重乘行
者蹄不剋公談私詠溢於人聽伊彼金其牛而誘之以利曷若我子其人而來
之以義乎既訖役南梁人書事於牘請紀之以附於史官地里志

劉賓客文集卷第八

...

...

劉賓客文集卷第九

記下

夔州刺史廳壁記

連州刺史廳壁記

機汲記

洗心亭記

復荊門縣記

武陵北亭記

夔州刺史廳壁記

夔在春秋爲子國楚并爲楚九縣之一秦爲魚復漢爲固陵蜀爲巴東梁爲信州初城於瀼西後周大總管龍門拓王公述登白帝歎曰此奇勢可居遂移府於今治所是歲建德五年隋初楊素以越公領總管又張大之唐興武德二年詔書其以信州爲夔州七年增名都督府督黔巫一十九郡開元中猶領七州天寶初罷州置郡號雲安至德二年命嗣道王鍊爲太守賜之旌節統峽中五郡軍事乾元初復爲州偃節於有司第以防禦使爲稱尋罷以支郡隸江陵按版圖方輸不足當通邑而今秩與上郡齒特以帶蠻夷故也故相國安陽公乾

曜嘗參軍事修圖經言風俗甚備今以郡國更名之所以然著於壁云凡名殊必以國事建必以年謹始也長慶二年五月一日刺史中山劉某記

連州刺史廳壁記

此郡於天文與荊州同星分田壤制與番禺相犬牙觀民風與長沙同祖習故嘗隸三府中而別合乃今最久而安得人統也按宋高祖世始析郴之桂陽爲小桂郡後以州統縣更名如今其制宜也郡從嶺州從山而縣從其郡邑東之望曰順山由順以降無名而相散者以萬數回環鬱遶迭高爭秀西北朝拱於九疑城下之浸曰湟水由湟之外支流而合輸以百數淪漣汨瀟擘山爲渠東南入於海山秀而高靈液滲漉故石鍾乳爲天下甲歲貢三百銖原鮮而膾卉物柔澤故紆蕉爲三服貴歲貢十笥林富桂檜土宜陶旅故侯居以壯聞石侔琅玕水孕金碧故境物以麗聞環峰密林激清儲陰海風馭温交戰不勝觸石轉柯化爲涼颺城壓赭岡踞高負陽土伯嘘溼抵堅而散襲山逗谷化爲鮮雲故罕懼嘔泄之患亟有華皓之齒信荒服之善部而炎裔之涼墟也永貞元年

余始以尙書外郎坐黨累出補茲郡居無何吏議以是遷也不足庚其責故道
貶爲朗州司馬後十年詔書徵還抵京師俄復前命佩故印綬而南曩之騎竹
馬北向相僂者咸任郡縣巾鞞來迎下車之日私喑且笑旣視事得前二千石
名姓於壁端宰臣王峻倖卿劉晃儒官嚴士元聞人韓泰僉拜焉或久於其治
功利存乎人民或不之厥官翹顛載於歌謠余不佞從羣公之後肇武德距於
今凡五十有七人所舉者四君子猶振裘之於領袖焉元和十一年七月二十
四日刺史中山劉某記

機汲記

瀕江之俗不飲於鑿而皆飲之流予謫居之明年主人授館於百雉之內江水
汙汙周墉閑之一旦有工爰來思以技自賈且曰觀今之室廬及江之涯閑不
容畝顧積塊峙焉而前耳請用機以汲俾轟然之狀莫我遏已予方異其說且
命之飭力焉工也儲思環視相面勢而經營之由是比竹以爲畚實于流中中
植數尺之臬輦石以壯其趾如建標焉索綯以爲緝縻於標垂上屬數仞之端

互空以峻其勢如張弦焉鍛鐵爲器外廉如鼎耳內鍵如樂鼓牝牡相函轉於
兩端走於索上且受汲具及泉而修綆下維盈器而圓軸上引其往有建瓴之
駛其來有推轂之易瓶縮不羸如搏而升枝長瀾出高岸拂林杪踰峻防劄蟠
木以承樹貫脩筠以達脈走下潺潺聲寒空中通洞環折唯用所在周除而沃
盥以蠲入爨而鑄釜以盈飴鍊之餘移用於湯沐涑澣之末泄注於圃畦雖漢
湧於庭莫尙其霑洽也昔予嘗登陴攔然念懸流之莫可遽挹方勉保庸督減
獲劑而挈之至於裂肩龜手然猶家人視水如酒醪之貴今也一任人之智又
從而信之機發於冥冥而形於用物浩漭東流赴海爲期幹而遷焉逐我頤指
擲之所謂阻且艱者莫能高其高而深其深也觀夫流水之應物植水之善建
繩以柔而有立金以剛而無固軸卷而能舒竹圓而能通合而同功斯所以然
也今之工咸盜其古先工之遺法故能成之不能知所以爲成也智盡於一端
功止於一名而已噫彼經始者其取諸小過歟

洗心亭記

天下聞寺數十輩而吉祥尤章章躡名山俯大江荆吳雲水交錯如繡始予以不到爲恨今方弭所恨而充所望焉旣周覽讚歎於竹石間最奇處得新亭形焉如巧人畫鰲背上物卽之四顧遠邇細大雜然陳乎前引人目去求瞬不得徵其經始曰僧義然嘯侶爲工卽山求材槩高孕虛萬景全來詞人處之思出常格禪子處之遇境而寂憂人處之百慮永息烏思猿情繞梁歷稜月來松閒彫鏤軒墀石列筍簾藤蟠蛟螭修竹萬竿夏含涼颺斯亭之實錄云爾然上人舉如意搥我曰旣志之盍名之以行乎遠夫余始以是亭圍視無不適始適乎目而方寸爲清故名洗心長慶四年九月二十三日劉某記

復荆門縣記

直故郢北走之道其聚邑曰荆門揭起重關殿於樂都名視縣內之制居殷形束之要故吏師重焉通外民之底貢會南藩之述職故賓禮蕃焉其肇允經營實王孫昌夔居荆以表之命行名建而締構之弗暇無幾何有由勇爵而授赤社於茲者激馳名於省嗇謂相沿爲非智因請罷去其號發踐吏以董之有司

不能端究事本循空言而可其奏繇是分地征以歸他邑野之人有回遠之歎廢文吏而顓戎督行之旅有誰何之難是利不及下也黎民病之自鄙而南斯爲畫疆抵郡之路貫其七舍持瑞節而銜急宣之使蓋陰相交遂使服縵胡者備問俗之對執刀七者申餽牢之禮是敬之不及賓也君子病之如是幾二十歲距永貞元年江陵尹裴公政成上游德及於人大建長利俾無遺害乃外濟羣欲內張全暮周圖經制條白於狀昌言旣從公議攸同志勞之徒樂用之工載大其門載高其墉徑術脈分闐闐架空然後析便地以肥之建具官以司之糜羨財以償其力役汰冗食以資其秩稍田里不聞於徵令縣官無減於歲入越某月旣成而落之官修其方人樂其居將迎犒飫之儀展廢置符繻之事舉戍夫有伍公吏有職由彙而分率無踰閑入其封者可以知教元和元年四海會同天子命公師長南宮三年公以介圭入覲途出斯邑邑人之華皓幼童咸須於道周距躍而謠曰起我堙廢而完之徠我蕩析而安之昔室於墟風搖雨濡自公優柔郭閑盈兮昔飲於洿夏涸冬枯自公感通鬻沸生兮淑旂之華兮

四牡之駢僂公之還兮觴以祝之卻略踟躕百形一音公爲駐錯衡而勞之有以文從公者紀事於牘且曰民可懷也蓋命夫學舊史之事以志焉公不得讓而從之走是以有授簡之辱初公以縣之之便聞於上也禹錫方以郎位貼職於計曹章下之日得以省事逮今以遷人獲宥於善部工休之日得以踐履故於拜命無牢讓於傳信無愧詞以爲古之創物建庸宜於人民而得其時者則必歌其事功爲後代法雅有營謝美召伯也傳稱城沂賢薦敖也賦水泉原隰之狀志慮事命日之規當書而詠之細亦弗可略也是用謹其本始而存乎篇俾後之視今者知楚郊之令典云

武陵北亭記

郡北有短亭繇舊也亭孤其名地藏其勝前此二千石全然見之建言而莫踐去之日率遺恨焉七年冬詔書以行使符授尚書水曹外郎竇公常曰命爾爲武陵守葢止三月以碩畫佐元侯平裔夷降渠魁又三月以順令率蒸民增水坊表火道是歲大穰明年政成農緣畝以勇勸工執技以思賈因民之餘力乘

日之多暇乃顧其屬曰郊道有候亭示賓以不恩也雖聞茲地韜美未發豈有待邪自吾之治於斯也購徒庀材大起堙廢未嘗植私庭鬻燕寢役必先公人不余瑕調賦幸均矣城池幸完矣而重浹辰之役掠苟簡之問卒使勝躅冒沒猶璞而不攻懼換符之日還復齎恨無乃遺誚於來者乎言得其宜智愚同贊於是撤故材以移用相便地而居要去凡木以顯珍茂汰汙池以通淪漣自天而勝者列於騁望由我而美者生於頤指箕張筵楹股引房櫳斧斤息響風物異態大道出乎左藩澄湖浸乎前垠仙舟祖輶絲是區處九月壬午工告休亭長受成赤車威遲於以落之肅賓而入園視有適沈水北澳陽山南麓默焉蘧蘧雄殿郊隅前軒舒陽朱檻環之舞衣回旋樂簾參差北廡延陰外阿旁注芊眠清泚羅入洞戶初筵修平彫俎靜嘉林風天籟與金奏合亦旣醉止州從事舉白而言曰室成於私古有發焉矧成於公庸敢無詞觀乎焚楣有巖丹腹相宣象公之文律曄然而光也望之弘深卽之坦夷象公之酒德溫然而達也庭芳萬本跗萼交映如公之家肥熾而昌也門闢戶闔連機弛張似公之政經便

而通也因高而基因下而池躋其高可以廣吾視泳其清可以濯吾纓俯於達
惟行旅謳吟是采瞰於野惟稼穡艱難是知雲山多狀昏旦異候百壺先韋之
餞迎退食私辰之宴嬉觀民風於嘯詠之際展宸戀於天雲之末動合於誼匪
唯寫憂公曰夫言之必可書者公言也從事不以私視子余從而讓之是自還
也其可乎迺授簡於放臣俾書以示後後之思公者雖灌叢萋草尙勿翦拜矧
暈飛之草然石刻之隱然歟

劉賓客文集卷第九

隆慶元年...

其無之奉祭存候文廟終續
出其位平野對簡故效因翰書以示對祭文思公告聖靈靈草倫修舊拜誠

却其聖公曰夫言之必而書答公言謝對專不以味既于余於而歸之具自聖

對行欲聖... 崇報公則謝對對靈靈具吹雲山矣然得且異刻百壹米草之

而海出因在祈基因在祈所而其高可以觀焉其於其備而又顯告聖則必

劉賓客文集卷第十

書

上杜司徒書

獻權舍人書

爲京兆李尹答于襄州第一書

爲京兆李尹答于襄州第二書

答饒州元使君書

答容州竇中丞書

答柳子厚書

與柳子厚書

答道州薛郎中論方書書

與刑部韓侍郎書

答道州薛郎中論書儀書

上杜司徒書

時元
元年

月日故吏守朗州司馬員外置同正員劉某謹齋沐致誠命僕夫持書敢獻於
司徒相公閣下昔稱韓非善著書而說難孤憤尤爲激切故司馬子長深悲之
爲著於篇顯白其事夫以非之書可謂善言人情使逢時遇合之士觀之固無
以異於他書矣而獨深悲之者豈非遭罹世故益感其言之至邪小人受性顛
蒙涉道未至末學見淺少年氣粗常謂盡誠可以絕嫌猜徇公可以弭讒愬謂
慎獨防微爲近隘謂艱貞用晦爲廢忠芻狗已陳刻舟徒識罟獲隨足俵然無
知事去癡想時時自笑然後知韓非之善說司馬子長之深悲跡符理會千古
相見雖欲勿悲可乎大凡恆人之所以靈於庶類以其能羣以勝物也烈士之
所以異於恆人以其仗節以死誼也然則交相喪者世與道難合并者機與時
是以有死誼之心而卒不獲其所者世人悲之獲其所矣而一旦如不得終焉
者君子悲之世人之悲悲其不遇無成而虧故其感也近君子之悲悲其不幸
既得而喪故其感也深其悲則同其所以爲悲則異若小人者其不幸歟閱者

昧於藩身推致危地始以飛謗生釁終成公議抵刑旬朔之閒再投裔土外黷
相公人知之鑑內貽慈親非疾之憂常恐恩義兩乖家國同負寒心銷志以生
爲慚雖欲瀝血以自明籲天以自訴適足來衆多之譏豈復有特達見知者邪
遂用誼盟於心不復自白以內咎爲弭謗之具以吞聲爲窒隙之媒庶乎日月
至焉而是非乃辨會友人江陵法曹掾韓愈以不幸相悲且曰相國扶風公之
遇子也厚非獨余知之天下之人皆知之矣余初聞子之橫爲口語所中獨相
國深明之及不得已而退則爲之流涕以訣又不得已而譴則爲之擇地以居
求之於今難與侔矣抑余又聞曩子之介於司徒府奉誠敬於山園上公亟亟
稱於人以爲不懈於位今則有修儀以贊其詔相者有備物以贊其容衛者七
月禮畢一朝慶行誥言敷之授以顯秩子獨足趾一跌而前勞併捐祝網之辰
動維疏目可封之代乃爲窮人斯常情之所悲矧知子之厚者夫踣者思起必
諄而求拯疾者思愈必呻而求醫子宜諱於有力而呻於有術如何以箝口自
絕爲智以甘心受誣爲賢嗛然自咎求知於默彼李斯逐焉而爲上卿鄒陽囚

焉而爲上客二子者豈默以求知者邪若可訴而不言則陷於畏可言而不辯則鄰於怨畏與怨君子之所不處子其處之哉韓生之言未及竟而小人不知感從中來始赧然以愧又缺然以慄終悄然以悲悲斯歎歎斯憤憤必有泄故見乎詞敢聞左右投所閱也嗟夫人之至信者心目也天性者父子也不惑者聖賢也然而於竊缺而知心目之可亂於撥蜂而知父子之可闕於拾煤而知聖賢之可疑況乎道謝孔顏恩異天性是非之際愛惡相攻爭先利途虞相軋則覺起希合貴意雖無嫌而謗生魯酒致邯鄲之圍飛鳶生博者之禍伯仁之殺由偶對伯奢之冤以器聲動懼險中皆出意表雖欲周防亦難曲施加以吠聲者多辨實者寡飛語一發臚言四馳萌芽始奮枝葉俄茂方謂語怪終成禍梯嗚呼人必求之不能自達何投分效節有積塵之難何譖行愛弛有決防之易何將進之日必自見其可而後親何將退之時乃人言其否而遂棄良由邪人必微邪謀必陰陰則難明微則易信罔極大甚古今同途是以前修鑒其若此姑以推心取信不以循迹生嫌由是求忠臣於孝子求良婦於罵己食子盡

節也推其忍可以疑心放曠違命也推其仁可以屬國若謂其孝於親未必能忠專於夫未必能貞忍於子未必能忍於其他仁於獸未必能仁於其類則是天下之人盡不可信而盡可誣固不然也凡人之行己必恆於所安苟非狂易不能甚異小人自居門下僅踰十年未嘗信宿而不侍坐率性所履固無遁逃言行之閒足見真態伏惟推心以明其迹追往以鑒於今苟謂其嘗掩人以自售矣嘗近名以冒進矣嘗欺謾於言說矣嘗沓貪於求取矣嘗狎比其瑣細矣嘗媒孽其僚友矣嘗短激以買直矣嘗詘譎以取容矣嘗漏言於咨諏矣嘗敗務於簿書矣有一於此雖人謂其賢我得而刑也豈止於棄乎苟或反是雖人謂其盜我得而任也庸可而棄乎由是而言小人之善否不在衆人所以受譴已還行及半歲當食而歎聞弦尙驚不以衆人之善爲是非唯以相公之意爲衡準自違閒左右亟蒙簡書慰誨勤勤窮頓增感伏想仁念必思有以拯之況禮道貴終人情尙舊嘗盡其力必加以仁於犬馬之微有帷蓋之報顧異於是豈無庶幾儻浮言可以事久而明衆嗤可以時久而息弘我大信以祛羣疑使

煢煢微志無已矣之歎覲乎異日得夷平民然後裹足西向謝恩有所復以塵纓驚貌稱故吏於相門此言朝遂可以夕死何則復於變者其義重拯於危者其感深睽而後合示終不可睽也否而後泰示終不及否也獲寶於己喪得途於既迷與夫平居不爲艱故所激者其味異矣伏以大君繼明元宰柄用鴻鈞播平分之氣懸象廓無私之照渙汗大號與人惟新昭回汪濊旁下郡國投荒爲民者咸釋拳桎遂還里閭繫於稍食猶在羈絆伏讀赦令許移近郊今武陵離京師贏二千者無幾小人祖先壤樹在京索閒瘠田可耕陋室未毀濡露增感臨風永懷伏希憫其至誠而少加推恕命東曹補吏置籍於滎陽伍中得奉安輿而西拜先人松檟誓當齋志沒齒盡力於井臼之閒斯遂心之願也如或官謗未塞私欲未從雖爲裔民乃有善地則北距澧浦資宿春而可行無道途之勤蠲僕賃之費重以鎮南用和輔理扇仁風於上游霽嚴施惠得以自遂斯便家之願也伏惟降意詳察擇可行者處之乞恩於指顧之閒爲惠有生成之重雖百穀之仰膏雨豈喻其急焉嗟哉小生仕逢聖日豈曰不辰知有相君豈

曰不遇而乘運鍾否俾躬罹災同生無手足之助終歲有病貧之厄孰不求達而獨招嫌孰不求安而獨乘坎賦命如此雖悔可追湘沅之濱寒暑一候陽雁纔到華言罕聞猿哀鳥思啁啾異響莫夜之後併來愁腸懷鄉倦越吟之苦舉目多似人之喜俯視遺體仰安高堂悲愁惴慄常集方寸盡意之具固不在言身遠與寡捨茲何託是以因言以見意恃舊以求哀敢希末光下燭幽蟄孤志多感重恩難忘顧瞻門館慙戀交會伏紙流涕不知所云禹錫惶悚再拜

獻權舍人書

禹錫在兒童時已蒙見器終荷薦寵始見知名衆之指目忝閣下門客懼無以報稱故厚自淬琢靡遺分陰乃今道未施於人所蓄者志見志之具匪文謂何是用顛顛懇懇於其闕思有所寓非篤好其章句泥溺於浮華時態衆尙病未能也故拙於用譽直繩朗鑒樂所趨也故銳於求益今謹錄近所論撰凡十數篇蘄端較是非取關於左右猶夫礦朴納於容範嘗聞昔宋廣平之沈下僚也蘇公味道時爲繡衣直指使者廣平投以梅花賦蘇盛稱之自是方列於聞人

之目是知英賢卓犖可外文字然猶用片言借說於先達之口藉其勢而後驥
首當時矧碌碌者疇能自異今閣下之名之位過於蘇公之曩日而鄙生所賦
或鉅於梅花則沈泥于霄懸在指顧閱其詞汰而喻僭誠贖禮也繫游藩之久
覬尙舊而霽嚴禹錫惶悚再拜

爲京兆李尹答于襄州第一書

閣下以大墓世在三原而去河南益遠尙繫於數百年之外於義不安遂奮然
移羣從率先行古占數爲京兆人且命使者修敬於鄙薄缺然不敢當此之重
洪惟閣下世雄朔易四姓之冠其宗勳有八柱之貴其碩德有三老之重因都
入雒錫之土田自生齒已上列於侯籍與夫其先嘗爲編戶民者大殊謹按永
徽格實在兩都者無害爲本部官蓋神州赤縣尊有所厭非他土之比實待罪
輦轂下閣下宣風江漢爲諸侯師介圭入覲必參大政其展禮措事宜爲羣倫
所觀非據之榮赧然汗下不宣實再拜

第二書

實白前辱閣下書厚自枉屈執州人之禮兼示移羣從書明所以去河南從京兆爲望之旨於古儀爲得然而通行之自久或獻疑焉是以前書不敢不逡巡牢讓亦有以發閣下之雄辯使矚然爲世程者今月某日函使至果貽理言大明時人之所以失而我獨障頽波而逢其原旣一辭不獲命又學淺不堪往復敢不敬從前史稱以大將軍而有揖客豈不爲重循汲直之言則有以略其理而增高者今鄙人之不讓適有以增閣下之重耳實白

答饒州元使君書

傳使至蒙致書一函辱示政事與治兵之要明體以及用通經以知權視陰陽慘舒之節取震虢澤濡之象知天而不泥於神怪知人而不遺於委瑣先鄉社之治以浹於舉郡首隊伍之法以及於成師猶言數者起一而至萬操律者本黃鍾以極八音誠通人之說章章必可行者也鄙生涉吏日淺嘗耳剽老成人之言熟矣今研覈至論淵乎有味非游言架空之徒喜未常不至扑也故揚摧所見以累下執事云蓋豐荒異政繫乎時也夷夏殊法牽乎俗也因時在乎善

相因俗在乎便安不知法斂重輕之道雖歲有順成猶水旱也不知日用樂成之義雖俗方阜安猶蕩析也徒木之信必行則民不惑此政之先也置水之清必勵則人知敬此政之本也聶筭之機或行則姦不敢欺此政之助也則有以其弛張雄雌唯變所適古之賢而治者稱謂各異非至當有二也顧遭時不同耳夫民足則懷安安則自重而畏法乏則思濫濫則迫利而輕禁故文景之民厚其生爲吏者率以仁恕顯武宣之民亟於役爲吏者率以武健稱其寬猛迭用猶質文循環必稽其弊而矯之是宜審其究奪耳太史公云身脩者官未嘗亂也然則脩身而不能及治者有矣未有不自己而能及民者今之號爲有志於治者咸能知民困於杼軸罷於征徭則曰司牧之道莫先於簡廉奉法而已其或材拘於局促智限於罷懦不能斟酌盈虛使人不倦以不知事爲簡以清一身爲廉以守舊弊爲奉法是心清於棖闥之內而柄移於胥吏之手歲登事簡偷可理也歲札理叢則潰然攜矣故曰身脩而不及理者有矣若執事之言政詰理切情斥去迂緩簡而通和而毅其修整非止乎一身必將及物也其程

督非務乎一切必將經遠也防民之理甚周而不至皎察字民之方甚裕而不使侵蝕知革故之有悔審科民之多撓厚發姦之賞峻欺下之誅調賦之權不關於猾吏逋亡之責不遷於豐室因有年之利以補敗汰不急之用以畜財爲邦之要深切著明若此其悉也推是言按是理而篤行之烏有不及治邪古稱言之必可行非樂垂空文耳有人民社稷固可踐其言也瀕江之郡饒爲大履番君之故地漸甌越之遺俗餘干音輪有畝鍾之地武林有千章之材其民牟利鬪力狃於輕悍故用暴虐聞重以山茂檟苦金豐鑠銑齊民往往投鋸鑿而卽鏟鑄損絲枲而工奪擷乘時詭求其息倍稱閭閻主分土者盡籠其利而幹之坐簿書舛錯爲中執法所劾事下三府以受賂論其刑甚渥於今列郡不寒而慄彼邦人聆其風聲固曰彼浚民者上罪之若此其念民也至矣今二千石以前失職非其罪執事者卽人心而用之彼邦人是必翹然須其至而安矣以思治之民遇習治之守欲不至於富庶得乎昌黎韓宣英好實蹈中之士也前爲司封郎以餘刃劓劇於計曹號無逋事能承其家法而紹明之庭堅仲容之族

也坐事爲彼郡司馬更聞餘者再焉是必能知風俗之良窳采寮之善否盍嘗問焉足爲羣疑之寶龜也至於否臧文律戢玩之戒均權以制動函隸以稔勇平居使不墮萃聚使不譁坐作疾徐心和氣振誠纖悉於所示也故置之以須執事異日承進律之命握獸符而駕寅車而後貢其警言重曉左右耳

答容州竇中丞書

健步劉子良至猥奉書教以愚爲希儒之徒重言一發華袞非貴世之服儒衣冠道古語居學官者爲不鮮矣求其知所以然者幾何人借曰有之未必不詬病耳今夫挾弓注矢遡空而發者人自以爲皆羿可矣移之於澤宮則噤而不敢言何哉有的不可欺故也今夫儒者函矢相攻蝸蟾相喧不啻於殼弓射空矢者孰爲其的哉異日見道大行則言益重使儒者之的懸於舌端不得讓也由是知辱教之喜可勝旣乎闕承得一二易生列侍絳帳荒服之外持經鼎來爭捐珠璣以易編簡不疾而速其君子之德風歟而裔憬俗已丕變矣顧其風候非民和可移地泄恆燠冬無嚴氣其在嗇神以佑藥兼味以禦稌所謂養賢

以及萬民順之時義不可不順苟以有待及物爲心則養己與養民非二道也矧羣情之顛顛乎禹錫再拜

答柳子厚書

禹錫白零陵守以函置足下書爰來屑末三幅小章書僅千言申申豐豐茂勉甚悉相思之苦懷膠結贅聚至是泮然以銷所不如晤言者無幾書竟獲新文二篇且戲余曰將子爲巨衡以揣其鈞石銖黍余吟而繹之顧其詞甚約而味淵然以長氣爲幹文爲支跨躒古今鼓行乘空附離不以鑿柄咀嚼不以文字端而曼苦而腴佶然以生癯然以清余之衡誠懸於心其揣也如是子之戲余果何如哉夫矢發乎羿毅而中微存乎他人子無曰必我之師而能我衡苟能則譽羿者皆羿也可乎索居三歲理言蕪而不治臨書軋軋不具禹錫白

與柳子厚書

閒發書得筆郭師墓誌一篇以爲其工獨得於天姿使木聲絲聲均其所自出抑折愉繹學者無能如繁休伯之言薛訪車子不能曲盡如此能令鄙夫冲然

南望如聞善音如見其師辱文寤事神驚心得徜徉伊鬱久而不能平嗟夫郭

師與不可傳者死矣弦張柱差楚宜反枵然貌存中有至音含糊弗聞噫人亡而

器存布方冊者是已余之伊鬱也豈獨爲號師發邪想足下因僕書重有概耳

不宣禹錫白

果可改答道州薛郎中論方書書

禹錫再拜初兄出中臺守江華人咸曰函牛之鼎以之烹小鮮惜乎餘地瀟漫

而無庸也愚獨心有概焉以爲君子受乾陽健行之氣不可以息苟吾位不足

以充吾道是宜寄餘術百藝以洩神用其無暇日與得位同久欲以是理求有

得於兄而未有路會崔生來辱書教果惠以所著奇方十通商古今之宜而去

其并猥以一物足以了病者居多非累試輒效不在是族或取諸屑近亦以擲

拾慮恆人多怠忽不省必建言顯白揚其功於已然其他立論率以弭病於將

然爲先而攻治爲後言君臣必以時言宣補必以性言砭灸必本其輪榮言被

襪必因其風俗齊和之宜炮剔之良暴灸有陰陽之候煎烹有少多之取撓

高

反勞以制駛露置以養潔味有所走董有所歸存諸纖悉易則生患非博極遐覽之士孰能知其所從來哉愚少多病猶省爲童兒時夙具襦袴保母抱之以如醫巫家鍼烙灌餌咍然啼號巫嫗輒陽陽滿志引手真求竟未知何等方何等藥餌及壯見里中兒年齒比者必睨然武健可愛羞己之不如遂從世醫號富於術者借其書伏讀之得小品方於羣方爲最古又得藥對知本草之所自出考素問識榮衛經絡百骸九竅之相成學切脈以探表候而天機昏淺布指於位不能分累菽之重輕第知息至而已然於藥石不爲懵矣爾來垂三十年其術足以自衛或行乎門內疾輒良已家之嬰兒未嘗詣醫門求治者頃因欲編次已試者爲一家方書顧力不足今兄能我先所以辱貺之喜信踰拱璧有以賞音適道耳常思世人居平不讀一方病則委千金於庸夫之手至於甚殆而曰不幸豈其不幸邪甚者或乘少壯之氣笑人言醫以爲非急昌言曰鉛口飽腹藥其如我何所承之氣有時而旣於禱神佞佛遂甘心焉兄以愚言覆觀之其人固比肩耳前蒙示藥焙法謹如教地之慝果不能傷雖莛

音柴胡水瀉喜

速朽者率久居而無害萬物不可以無法謂生不由養志其誣乎山川匪遐事使之遠形不接而諭者莫賢乎書臨紙怙悵不宜禹錫再拜

與刑部韓侍郎書

退之從丞相平戎還以功爲第一官然猶議者矜然如未遷陟此非特用文章學問有以當衆心也乃在恢廓器度以推賢盡材爲孜孜故人心樂其道行行必及物故耳前日赦書下郡國有棄過之目以大國材富而失職者多千鈞之機固省度而釋豈鼯鼠所宜承當然譬諸螫蟲坏戶而俯者與夫槁死無以異矣春雷一振必歆然翹首與生爲徒況有吹律者召東風以薰之其化更益速雷且奮矣其知風之自乎旣得位當行之無忽禹錫再拜

答道州薛郎中論書儀書

吾兄不知愚無似猥以書見攻其非且曰我與子中外屬當爲伯仲其抵我書執禮太卑按舊儀凡兄姊之齒有唯無伏他以是爲衰其於匹敵卽前云願後云曰而已大曆初李贊皇買常侍猶守之無渝二公何人也我與子何人也烏

有從末俗以姑息爲禮而不虞識者所窺邪其有云爾愚得之退而思惟愀然
自智曰在恆人爲宜而在愚爲過豈不能幸歟故盡言於兄期有以相暢耳夫
禮之文爲者定宜尊宜卑猶四方上下左右前後稱謂一立古先聖賢所不敢
移管敬仲不敢當命卿之饗虞人不敢承大夫之招先禮而後身也汲黯不爲
大將軍而虧九卿王祥不爲錄尚書而屈三公先道而後時也是則非據之榮
雖君命有所不受非道之利雖衆尙有所不爲兄長於大曆初嘗接前輩游欽
其風采去承平時不甚相遠愚長於貞元中所與游皆後來諸生然猶於稠人
廣坐時聞老成人之說灌注耳目斑斑然不絕如綫其後爲御史四方諸侯悉
以書來賀校其禮皆駁不同唯洪州牧李常侍巽潭州牧楊中丞憑始言執事
其他如儀而同在憲司者咸以二牧爲不遜愚時與其僚柳宗元昌言於衆曰
監察八品也當衣碧言執事爲宜不當經怪衆咸聽然而哈復謂愚云子奚不
碧其服邪其不堪執事色深不可以言解及謫官十年居僻陋不聞世論所以
書相問訊皆昵親密友不容變更而時態高下無從知耳前年祇召抵京師偶

故人席夔談因及是事乃知與十年前大殊至有同姓屬尊致書於屬卑而貴者其紙尾言起居新婦變獨竊笑之而已然猶不敢顯言詆之今有人謂東爲西者一言發則凡人嗤爲駭且狂苟不衆非之則東西易位久矣尊卑失其儀恬而不怪安得使人如東西不敢易之哉曾子有云君子之愛人也以德細人之愛人也以姑息謂古人悉朴且賢則斯言不當發於洙泗閒耳蓋三代之尙未嘗無弊由野以至僿豈一日之爲漸靡使之然也嫉其弊而救之以歸於中道必俟乎薦紳先生德與位并者揭然建明之斯易也語曰俟自直之箭則百代無一矢俟自圓之木則千歲無一輪執矯揉之器者視之灌叢無非良材耳竊觀今之人於文章無不慕古甚者或失於野於書疏獨陋古而汨於浮二者同出於言而背馳非不能盡如古也蓋爲古文者得名聲爲今書者無悔吝如

水走

以下
元闕

劉賓客文集卷第十一

表章一

為淮南杜相公
佑脩凡十首

讓同平章事表

謝平章事表

謝手詔表

詔後敕
親批

謝貸錢物表

請赴行營表

謝兵馬使朱鄭等官表

賀復吳少誠官爵表

賀除虔王等表

慰義陽公主薨表

慰王太尉薨表

讓同平章事表

臣某言高品吳千金至奉制加臣銀青光祿大夫同中書門下平章事兼徐泗濠等州節度觀察處置等使餘如故者初受恩榮若登霄漢退思塵忝如履春冰臣誠惶誠恐頓首頓首臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯報政之能愧無可稱以答高位豈意聖慈弘獎天澤薦加以燮贊之崇名被庸虛之陋質懼速官謗有玷大猷伏以宰相之職安危是注其在當否繫於慘舒惟以材升例無平進舉不失德則副蒼生之心苟非其人或致外夷之哂臣雖愚昧嘗覽前言豈敢冒榮遂安竊位輒思事理冀盡芻蕘若以汴河要津漕運所切徐方倣擾師旅未寧謹當上稟叡謀下貞戎律克期而進屈指可平勵衆之先是臣之志既行其事必在正名所加節制安敢飾讓至於銀青貴服金鉉重名勳績無聞豈宜濫及伏乞賜寢前命俯亮愚衷微臣遂知止之宜聖朝無不稱之服名器斯慎退讓有聞遐邇聆風孰不知勸其新授官告謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷昧死陳讓再奉嚴旨不令固辭恩厚命

輕位高責重

中謝

臣聞天下安危注意將相處論道具瞻之地當總戎作鎮之權

雖協夢而求無聞秉鉞之寄登壇以拜不兼調鼎之榮授受惟艱伊昔猶爾況臣庸瑣何以克堪陛下玄造曲成大明私照俾掌戎律復參廟謨寵光之崇在臣已極毫髮之效於國何施謹當罄竭微誠奉遵至教仗天威以懾不類敷聖澤以遂羣生上分旰食之憂下塞素餐之責力誠不足心實念茲伏乞皇明俯賜照鑒臣恪居官次退守藩維不獲伏謝彤庭陳露丹慊心存闕下同犬馬之戀恩身在淮潛仰雲天而結思無任懇悃屏營之至

謝手詔表

詔後批云
朕自書

臣某言中使閩忠信至奉宣聖旨存問兼賜臣手詔拜捧紫泥跪伸金簡承旨

見聖神之略感恩知身命之輕

中謝

臣素乏異能幸逢昌運猥當旄鉞之寄未靖

祆氛榮分台鼎之名何階啓沃竊位斯久速尤是虞豈謂玄化曲成鴻私薦及特紉睿思親灑仙毫降自九重粲然五色初喜麗天之象遠燭輝光旋驚垂露

之蹤曲覃霈澤鸞鳳騫翔而變態煙雲舒卷以呈姿賦彩飛文聳神蕩目恭惟國寶何幸家藏感極涕零莫知上答應緣軍旅庶務謹具別狀奏聞無任欣戴屏營之至

臣某言謝貸錢物表

臣某言中使南宮懷珍至奉宣聖旨存問兼賜臣墨詔天光下濟叡澤曲流銜恩未酬居寵彌懼中謝臣受任斯極微功莫施昨以封略未寧干戈猶動壽春固

壘以備盜淮甸與師以扞姦經費所資數盈鉅萬餽餉時久供億力殫慮始圖終不敢緘默輒陳管見上黷宸聰伏蒙聖慈特遂誠請遠承如綍之旨特假聚人之財軍須不愆士氣彌振糗糧既備永無半菽之虞襦袴足頒遠超挾纊之感是為說使咸願先登臣忝總戎倍百欣荷伏以上分國用俯濟軍興候清煙塵謹備償納

請赴行營表

臣某言臣自守淮濱已周星紀虔奉朝典粗安遐方素效未聞新恩薦及身曳

兩綬寄深一隅蚊蚋負山力誠不足鷹鷂逐鳥志則有餘臣再授兵符夙參軍幕披堅執銳雖未經於戎行制勝伐謀亦常習於事業自忝藩翰屬時清平無施汗馬之勞但詠橐弓之什今則幸遇殊獎委之專征以身率先是臣素志况聞徐州士衆本無叛心倉卒之閒危疑至此臣請自臨疆場親領紀綱裂帛繫書諭其禍福椎牛饗士養以威聲冀宣皇風煦茲蠢類以忠義感脅從之伍以含弘安反側之徒革面悛心期乎不日其揚州留務請令行軍司馬路應權知伏乞聖慈俯賜照鑒

謝兵馬使朱鄭等官表

初除侍御史續除中丞異姓王

臣某言奏事官韋溫特蒙聖恩重賜朱鄭等官告宸象昭回煥然下燭榮分右職光賁遐藩中謝臣伏以朱鄭朴忠爲心沈毅見色當建封禦侮之寄見張愔提孩之年昨者隸職徐州分鎮斬懸繹騷之際梗亮彌彰歷險而來寔繁其旅詳探本末有足褒稱輒具奏聞恐須獎勸伏蒙睿覽俯亮微誠優詔先行已階直指之列殊私薦至超升獨坐之崇戶領三千爵踰五等恩生非次感異常倫輒

門有光武旅增氣遂使感激之士希勇爵以捐軀猖狂之徒聆聖澤而悛性風
行草偃其勢必然臣忝總戎麾倍百欣荷

賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事

天地弘覆燾之恩雷兩施渙汗之澤瑕累咸滌危疑獲安謝中臣伏以少誠擅興

兵戈事生註誤自王師致討天威下臨曾無悖辭亟聞引咎初懷疑懼雖擁衆

以偷生旋感聖神屢拜章而請命陛下仁深解網慮軫納隍念餽餉飛輓之勤

閱戰爭暴露之苦舉茲宥過之典副彼效順之誠一方承再造之恩九有覩惟

新之化敷鴻濡而覃及蠢類鼓仁風而臻於太和罷柝銷鋒自茲而始臣謬膺

重寄虔守遐藩不獲稱慶播擗陳露丹懇仰瞻宸極倍百常情無任慶抃屏營

之至

賀除虔王等表

臣某言中使李國真至奉宣聖旨存問兼賜臣墨詔鴻澤浹下大明燭幽曉諭

便蕃慰安稠疊謝臣伏覩天書恭承睿旨弘愛人屈己之道酌因時適變之宜

擇賢王作鎮徐方俾張愔便主留務上則成邦家盤石之固下則副士衆拜章

之請咸藩之寄斯重舊勳之祀獲全丕變猖狂之徒咸躋仁壽之域既弘在宥

坐見止戈率土人臣孰不欣說臣素乏方略謬荷寵光猥塵將相之名無施分

寸之績遭逢若此報效蔑聞官謗已興渥刑宜及陛下恩深覆載道務含弘恤

公私餽餉之勤念吏士鋒鏑之苦特紉神算昭發德音危疑獲安制置惟固好

生宥過誠陛下開網之仁尸位無功重微臣素餐之責周章踟躕胡顏自安但

以遐守藩條恪居官次不獲仰謝雲陛陳露血誠未遂周任知止之言敢逃臧

文竊位之咎無任戰越之至

慰義陽公主薨表

臣某言伏承義陽公主薨伏惟聖懷傷悼增切伏以公主妍姿令則冠絕天人

稟教皇宮已挺柔嘉之德降嬪卿族益彰貞粹之儀方其作範壺闈長榮邸第

豈意遽茲短曆奄謝昌辰伏慮陛下軫念未捐深慈莫遣有虧常膳罷設宮懸

臣子之情不任惕戀況聖凡禮異邦家制殊伏願道齊彭殤理達脩短割肌膚之愛慰寰海之心率土人臣孰不相慰無任懇悃屏營之至

臣某言慰王太尉薨表

臣某言伏承成德軍節度使太尉兼中書令王武俊今月某日薨沒伏以武俊生逢昌時天授忠節奮揚義勇茂建勳庸秩冠朝端參燮和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊襚以興懷聽鼓擊而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十一

臣某言伏承成德軍節度使太尉兼中書令王武俊今月某日薨沒伏以武俊生逢昌時天授忠節奮揚義勇茂建勳庸秩冠朝端參燮和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊襚以興懷聽鼓擊而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十二

表章二 為淮南杜相公佑修凡十一首

謝冬衣表

謝濠泗兩州割屬淮南表

謝曆日面脂口脂表

謝墨詔表

論廢楚州營田表

請朝覲表

謝春衣表

謝賜門戟表

謝男師損等官表

謝端午日賜物表

謝墨詔表

謝冬衣表

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣兩副大將衣四副者大明昭回遠燭下土殊錫稠疊延及偏裨慶抃失圖捧戴相賀云云臣謬承委寄獲守藩條灰琯屢移塵露無補陛下至仁天覆玄化風薰頒以兼衣賁茲瑣質降自天府光於轅門緘滕既開觀綵章之盛飾蹈舞而服發温煖於祁寒愧塵補袞之名更荷解衣之賜恩波下浹將校同沾共戴殊榮感思竭節生成是荷雨露難酬無任懇悃慚荷之至

謝濠泗兩州割屬淮南表

臣某言伏奉十一月二十九日詔書其濠泗兩州令臣依前收管臣謬承寵光作鎮淮海位均九伯權總十連內省無堪常恐不逮豈謂恩私曲被封略有加慚無報政之勤重受分憂之寄伏以兵戈方息閭里未安謹當奉宣皇風慰彼黔首且責成於牧宰期不失於澄清伏惟聖明俯賜照鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官吏僧道耆壽百姓等兼賜
臣墨詔及貞元十七年新曆一軸臘日面脂口脂紅雪紫雪并金花銀合二合
稜合二皇明遠燭殊錫薦臻抃舞失容捧戴無措伏惟皇帝陛下立極御人順
時布政禮崇大蜡澤浹遐藩臣叨榮日深竊位時久謬回宸眷猥降王人天書
下臨覩三光之照耀玉曆爰授知四時之環周雕匳既開珍藥斯見膏凝雪瑩
含液騰芳頓光蒲柳之容永去癘疵之患命輕恩重上答何階無任感抃屏營
之至

謝墨詔表

臣某言中使陳日華至奉宣聖旨存問兼賜臣墨詔又以臣所奏羅珣及裴靖
政理有方今各賜手詔激賞者恩降重霄澤流下土義存獎勸榮冠等夷臣昨
以羅珣裴靖勵精吏理效用著明人咸說安俗致殷阜急須甄錄以勸在官輒
獻封章具陳成績伏蒙睿鑒俯亮愚衷載嘉理行之尤光示絲綸之旨守道者
益以固志懷慝者由是悛心激俗化人於茲爲大臣謬司廉問職在澄清幸遇

旌善之時獲免蔽賢之責無任欣感之至
論廢楚州營田表

臣某言中使曹進玉至奉宣聖旨存問兼賜臣墨詔以楚州營田廢置事令臣
商量奏來者跪奉天書恭承睿旨道存致用義在隨時云云伏以本置營田是
求足食今則徒有廢費鮮逢順成刈穫所收無裨於國用種糧每闕常假於供
司較其利害宜廢已久比來循守舊制不敢輕有上陳皇明鑒微特革斯弊取
其田蓄授彼黎蒸仍俾簿租誠為至當但以田數雖廣地力各殊須量沃瘠用
立程度臣已追里正臣與商量利便謹具別狀奏聞伏惟聖慮俯賜詳擇無任
震越屏營之至

請朝覲表

臣某言臣聞臣之事君有犯無隱懇誠所至敢不罄陳伏惟聖明俯賜矜察云
云臣代受國恩忝承門蔭脫巾筮仕敢期榮名陳力效官靡樹聲績始因孤直
驟歷清班復加朝獎作藩外府遠違輦下十有四年恪守淮濱逮今一紀犬馬

懷戀寢興匪遑蒲柳易衰遲莫俄及竊位時久妨賢愧深沉歷官已來四十八
考祇奉朝謁時纔二周服勤郡符在苒垂老屏營魏闕之思夢想承明之游如
迫餒寒不忘衣食伏惟睿鑒俯亮愚衷蚤賜擇人與臣交代授受之際冀無可
虞然後脂車奔赴京輦微願斯畢雖死猶生臣頃以戎務方殷猥加宰輔今既
事罷實慚此名爲有藩鎮同時未敢輕上印綬伏以聖朝赫赫左右惟賢漢愧
得人周慚多士臣才略旣短齒髮又衰柄用之地甘心自絕所冀退歸舊里沐
浴皇風絕鍾鳴漏盡之譏展維桑與梓之敬匪惟名器不假實貴骸骨可全知
止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官吏僧道耆壽百姓等并賜
臣墨詔及春衣兩副大將衣四副王人捧詔御府降衣寵光不隔於遐藩慶賜
猥霑於裨將臣素乏器能謬膺驅使每慚效薄常懼食浮陛下覃以至仁均其
厚施宰元和而布澤順時律以頒衣出自禁中賁於臣下執領綸而抃舞失次

被纖柔而顧盼增輝舉體動容既安且吉在身不稱恐招鷄翼之譏居位無功叨受鶴紋之賜下延將校同荷生成

謝賜門戟表

臣某言臣得進奏官裴邁狀報本月九日軍器使梁延專奉宣進止付所司准省牒賜臣門戟十二竿者恩降雲天榮加門戶承旨慶抃省躬慚惶伏以禮著等威朝有命數是昭懋賞必在疇庸臣謬荷寵光素無績效旌旄之寄已忝外藩榮戟爰列更光私第賁於棖闈慶及子孫覩茲盛儀實愧虛受無任欣戴屏營之至

謝男師損等官表

伏見今月一日制授臣長男師損祕書省著作郎次男式方太常寺主簿又得進奏官裴邁狀報伏承聖恩特降中使送官告到臣宅分付師損者寵渥非常授任不次驚躍無措覩懼失容云云臣謬分重寄獲守外藩受恩既深無績可紀男師損等器惟凡品教闕義方蚤沐睿慈已階官次每懷塵忝常誠滿盈豈

謂鴻濡曲覃大明私照寬臣尸素之責念臣葵藿之誠下延胤息叨踐班級天書出禁中貴臨門榮冠等夷慶流宗族況著作乃論撰之地唯才吏是居太常實禮樂之司非儒者勿履顧茲庸昧忽此超昇內省慚惶若墜冰谷伏以聖朝立制建官惟賢名實無乖輪轅盡適微臣父子獨爲幸人非據踰涯自中徂外虛受丘山之賜實增負乘之憂進退彷徨不知所據無任戰汗屏營之至

謝端午日賜物表

臣某言中使劉光弼至奉宣聖旨慰勞臣及將佐官吏僧道耆壽百姓等兼賜臣墨詔并衣一副金花銀器三事綵絲一軸大將衣四副綵絲五軸龍光薦至慶賜曲霑抃舞失容捧戴無力伏以朱明仲月端午佳辰萬國被薰風之和九天垂湛露之澤臣幸逢休運獲守外藩叨承歡慈猥受榮賚發詔而煥窺宸象振衣而頓失炎威色絲表祥戴光於佩服珍器充玩盡飾於圓方恩輝旣盈喜懼交集下延禪將共荷鴻私無任感戴之至

謝墨詔表

臣某言中使陳日華至奉宣聖旨慰勞臣及將佐官吏僧道耆壽百姓等兼賜
臣墨詔恩降紫泥澤流下土跪奉自天之命遙馳捧日之心云云伏以皇帝陛
下凝旒穆清軫念黎獻已洽雍熙之化尚存宵旰之勤遠降王人特迂宸翰慰
安稠疊曉諭便蕃任重力微不知上答應緣戎旅庶務謹具別狀奏聞伏乞皇
明俯賜照鑒無任感戴屏營之至

劉賓客文集卷第十二

劉賓客文集卷第十三

表章三

爲杜司徒讓度支鹽鐵等使表

爲杜司徒謝追贈表

爲杜司徒讓淮南立去思碑表

爲京兆李尹賀遷獻懿二祖表

爲京兆韋尹賀兩止表

爲京兆韋尹賀祈晴獲應表

爲京兆韋尹謝許折糴表

爲京兆韋尹賀元日祥雪表

爲京兆韋尹賀春雪表

爲京兆李尹賀兩表

爲李中丞謝紫雪面脂等表

爲李中丞謝鍾馗曆日表

爲杜相公謝鍾馗曆日表

爲武中丞謝新茶表

爲武中丞謝春衣表

爲武中丞再謝新茶表

爲武中丞謝新橘表

爲武中丞謝柑子表

爲武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章事充度支及諸道鹽鐵轉運等使者臣久塵高位尸素已多更受新恩滿盈爲懼云云伏惟皇帝陛下紹登寶位光纂鴻猷擢用之閒華夷聳聽況利權所在宜適變通國計是資須明輕重當至化鼎新之日是微臣遲莫之年將何以上副宸衷下成庶務進退惟

谷冰炭在懷輒罄愚誠冀回天監陳力無補庶遵周任之言循涯若驚敢飾范
宣之讓慚惶踟躑倍萬常情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕射者時逢霽澤禮極徽章
云云臣家受國恩至臣累葉常懼不克負荷以忝前人豈意多幸遭逢猥居高
位陛下應乾御極作解庇人恩浹寰區禮成宗廟垂仁布德自葉流根紫書忽
降於重霄密印榮加於厚夜星霜增感蒸嘗有輝非臣殞越所能上報無任感
咽屏營之至

杜司徒讓淮南立去思碑表

臣某言伏見淮南節度使王鏐所奏當道將吏僧道耆壽等請爲臣立去思碑
伏奉聖旨允其所奏臣內惟菲薄聲績無聞祇荷恩私慚懼交至云云臣伏蒙
先朝過獎累典方隅頃鎮江都十有四載數周星紀水旱備經境接淮瀆兵戈
時起至於邑里粗免流離非臣所能悉稟聖化在唐堯可封之日奚假吏師當

漢室責實之時皆承認詔旨王鏐與臣交代輒有上聞況以去思爲名慚無可紀之績伏以建碑有制甲令垂文苟非至公翻益貽誚臣伏覽故事宋璟自廣州都督入爲尚書南海之人請爲刊石璟自遜讓至於再三雖勒其文竟從降制著在國史垂爲美談璟非苟榮人益見德臣才誠不逮心實慕之伏乞聖慈賜寢前命臣情非飾讓義在徇公云云

京兆李尹賀遷獻懿二祖表

實

臣某言伏見詔書以今月某日奉遷獻祖懿祖神主祔於德明興聖皇帝廟盛禮云畢宗祧永安云云伏以太祖景皇帝膺期撫運啓封於唐爲百代不遷之宗開三靈眷命之兆頃以本朝初建清廟備儀二祖冠西室之先景皇闕東向之位諸儒獻議歷載未行陛下濬發叡謨旁延正論爰詔多士會於中臺酌三禮之前文參百王之故事講貫斯定詢謀僉同撰日展儀考祥視履配貴神於遠祖正尊位於始封廟貌有嚴禘嘗允穆示人以孝得禮之中旣觀秩秩之容必降穰穰之福臣職居內史屬忝本枝躬導盛儀獲申誠敬無任感說屏營之

至

京兆韋尹賀雨止表

夏卿

臣某言今月某日中使吳文政奉宣聖旨緣今年雨多恐傷苗稼諸有靈跡處並宜祈禱者臣謹檢尋祀典方議徧祠惟德動天倏已澄霽伏以至教惠農兆人務本今歲宿麥茂於常年爰自季春遂逢多雨蓋陰陽常數有以推遷而隴畝之閒未聞傷敗陛下勞謙思切覆育恩深或慮成災先期軫念昭薦未陳於方社睿誠已格於上玄文明煥開陰暄潛埽有年之慶實兆於茲辰先天不違夔超於前代臣謬司京邑虔撫蒸黎欣抃之誠倍百羣品無任踴躍屏營之至

京兆韋尹賀祈晴獲應表

臣某言今月十七日中使某奉宣聖旨以霖雨未晴諸有靈跡並令祈禱者臣當時於興聖寺竹林神親自祈祝兼差官城外分路徧祠伏以神祇效靈景物澄霽兆庶覩動天之德大田俟多稼之期臣謬荷恩輝忝司京邑抃說之至實倍常情

京兆韋尹謝許折糴表

臣某言伏奉詔旨以臣所請畿內折糴宜令度支計會定數奏來者天慈廣被人瘼是求臣自理京邑不先威刑唯務便安所期富庶每因賜對常奉德音府縣之閒巨細令奏伏以聖明在上風雨應時順成之年穀糴常賤若無輕重之法必利兼并之家輒敢上聞請行折糴天光下燭人隱無遺宣付所司允臣所奏事關理本惠及生靈臣忝尹京倍百欣荷無任歡躍屏營之至

京兆韋尹賀元日祥雪表

臣某言伏以去冬已來久無雨雪臣每於內殿親奉德音以宿麥未滋爲虞以兆人生疾爲念聖情所屬神理階通獻歲發春佳雪肇降當夷夏會同之日觀天人合應之徵迎喜氣於三元浹歡心於萬國癘疵永息豐阜可期臣以疾疹未平步趨有阻伏蒙恩貸已具奏聞謹於光宅寺中管當本務不獲隨例稱慶明庭既覩嘉祥益彰聖德無任欣躍屏營之至

京兆韋尹賀春雪表

臣某言伏奉詔旨充某郡主禮命賜使謝恩之日親承德音以春初已來雨雪猶少慮妨農事有軫睿慈今當下嫁之辰克致上玄之感雲生河漢及佳期而降祥雪滿寰區應豐年而呈瑞臣官當撫字職在肅雍慶抃之誠實倍常品

京兆李尹賀雨表

臣某言伏奉進旨以時雨愆候有妨耕農應諸有靈跡處並令祈請者德音才發膏雨驟飛滂濡已周動植咸說云云伏以久愆時澤上軫聖慈爰命禱祈俾申誠敬神應如響天且不違未興雲漢之詩已致桑林之雨臣謬司京邑虔撫黎蒸覩豐年之可期同比屋而稱慶無任欣抃之至

李中丞謝賜紫雪面脂等表

表

臣某言中使某乙至奉宣聖旨賜臣紫雪紅雪面脂口脂各一合澡豆一袋特降王人俯臨私第銜恩慶抃省己慚惶云云臣謬荷寵私素無績效空變星霜之候猥霑慶賜之恩跪捧雕匳榮觀珍藥功能去疾永絕於癘疵澤可飾容頓光於蒲柳生成是荷雨露難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日一軸恩降雲霄光生里巷雖當歲莫如煦陽和云云伏以將慶新年聿循故事續其神象表去癘之方頒以曆書敬授時之始微臣何幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀方回雖逢歲盡恩輝忽降已覺春來云云伏以圖寫威神驅除羣癘頒行肆曆敬授四時施張有嚴既增門戶之貴動用協吉常爲掌握之珍瞻仰披尋皆知聖澤無任欣戴之至貞元二十一年十二月日

武中丞謝新茶表

元衡

臣某言中使竇國安奉宣聖旨賜新茶一斤猥降王人光臨私室恭承慶賜跪啓緘封云云伏以方隅入貢采擷至珍自遠爰來以新爲貴捧而觀妙飲以滌煩顧蘭露而慚芳豈蔗漿而齊味既榮凡口感倍丹心無任歡躍感恩之至貞

元二十年三月日

武中丞謝春衣表

臣某言中使某乙奉宣聖旨賜臣春衣一副王人臨第御府降衣抃舞失容捧戴無措云云伏以律當春莫慶洽時邕萬物被薰風之和九天垂湛露之澤受任非次速尤是虞方懷匪服之憂更荷解衣之賜恩加盡飾拖朱紫而爲榮受非以庸顧形影而增愧丹誠徒罄玄造難酬無任踴躍屏營之至

武中丞再謝新茶表

臣某言中使某乙奉宣聖旨賜臣新茶一斤猥沐深恩再霑殊錫承旨慶抃省躬慚惶伏以貢自外方珍殊衆品效參藥石芳越椒蘭出自仙廚俯頒私室義同推食空荷於曲成責在素餐實慚於虛受

武中丞謝新橘表

臣某言中使某乙至奉宣聖旨賜臣新橘若干顆特降寵光猥頒慶賜珍躡百果榮比兼金伏以丹實初成苞貢爰至芬馨味重方列於御筵雨露恩深忽霑

於賤品感同推食事等絕甘豈唯適口爲珍實冀捐軀上答

武中丞謝柑子表

臣某言中使某乙至奉宣聖旨賜臣柑子若干顆特降殊私再頒名果自遠稱貴以新爲榮伏以方貢外來人閒未覩黃苞輝穎彫俎增華芬芳初佐於大庖慶賜遂沾於凡口甘踰苹實剖食旣同於楚謠寒比蔗漿析醒何慚於漢史感恩思效倍百常情

武中丞謝冬衣表

臣某言中使某乙至奉宣聖旨賜臣冬衣一副恩降重霄榮加陋質承旨慶抃省躬慚惶臣受任已來微效莫著每更時律慚曠官常豈謂玄造曲成鴻私薦及念茲戒寒之候錫以禦冬之衣抃舞失容顧盼增飾鶴文是錫遠慚晉代之賢鷄翼不濡實懼曹風之刺無任感戴屏營之至

劉賓客文集卷第十四

表章四

牋附

為容州竇中丞謝上表

謝中使送上表

賀收蔡州表

賀赦表

賀赦牋

賀雪鎮州表

賀平淄青表

夔州謝上表

賀冊皇太子表

慰國哀表

賀龍飛表

賀皇太子牋

賀赦表

賀冊太皇太后表

賀冊皇太后表

和州謝上表

賀改元赦表

夔州論利害表二首

為容州竇中丞謝上表

羣時在朗州相逢因以見託

臣某言伏奉某月日制書授臣容州刺史兼御史中丞充本管經略招討等使臣發開州日已差某官某乙奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術頃因多幸賁自丘園累沐聖慈驟居清貫識昧通變動乖事宜愧無善狀以塞公責伏惟睿聖文武皇帝陛下凝旒穆清洞照寰海推共理之義分寄股肱念蒸人之勤溥沾遐邇

察臣前任事實恕臣本性朴愚賜以恩輝拔於廢棄遠辭偏郡重委方隅捧印授以爲榮望闕庭而增戀雖到官之始惠未及人而率下之誠務先克己凡施正教皆稟詔條參以土宜遂其物性可行必守有弊必除使蠻夷生梗之風慕臣子盡忠之道力誠不足心實在茲伏乞聖明俯賜照鑒無任感戴屏營之至元和八年云云

謝中使送上表

臣某言中使吐突仕曉至奉宣聖旨慰諭并送臣至本任者深山遠郡忽降王人跪受恩榮仰瞻宸極伏以發自巴峽至于南荒涉水陸湍險之途當炎夏鬱蒸之候山川縈轉晨夜奔馳幸無他疾得至本管九重結戀遙傾捧日之心萬里獲安皆荷自天之祐無任感戴屏營之至

賀收蔡州表

臣某言伏見詔書以唐州節度使李勣生擒逆賊吳元濟獻俘文武百僚於興安門列班稱賀者天威遠被元惡就誅一方既平萬國咸慶伏惟睿聖文武皇

帝陛下德超邃古道合上玄臨御已來天人協贊削平吳蜀埽蕩塞垣車書大
同夷狄來貢叢爾元濟敢懷野心輒聚犬羊苟偷時月陛下聖謨獨運叡感潛
通天助神兵人生勇氣旣擒兇逆遂正刑書伏三紀之逋誅成九衢之壯觀宗
社昭告華夷式瞻行弔伐而在禮無違烜威聲而何城不克楚氛改色淮水安
流漢上疲人盡霑雨露汝南遺老重覩昇平凡在具臣孰不欣抃臣久辭朝列
恭守遐藩不獲稱慶闕庭陳露丹悃仰瞻宸極倍萬羣情無任踴躍慶快之至
元和十二年十二月二十三日

賀赦表

臣某言伏奉今月一日制書大赦天下者聖德廣運浹於華夷天光下臨照彼
幽蟄伏惟叡聖文武皇帝陛下神扶寶祚天贊鴻猷意有所之事無不克當淮
右凱旋之後是域中慶幸之時順陽和以發生施濡澤於寰海網開三面危疑
者許以自新耳達四聰瑕累者期於錄用求碩畫於庶位慮遺材於放臣旌忠
烈之家賞勳庸之胤仁及枯骨無隔於寇戎榮加顯親普沾於存沒恤刑已責

寶廩蠲徭頒錫彰有客之詩崇儒協宗子之望岳瀆咸秩耆艾飲和大僚承任
子之恩武旅荷賜金之寵斯皆禹湯文武之遺美高祖太宗之耿光集於聖朝
然後大備德音所至和氣隨之歡謠上徹於九天福祚永延於億載能使遠夷
屈膝豈惟小醜革心率土人臣不勝大慶臣久辭闕下恪守海隅犬馬之誠倍
百常品無任抃躍屏營之至

賀赦牋

使持節連州諸軍事守連州刺史劉某惶恐叩頭伏見今月一日制書大赦天
下者伏以獻歲布和皇恩遠降乾坤交泰寰海廓清伏惟皇太子殿下道冠元
良德兼忠孝承顏拜慶榮輝古今某職守有限不獲隨例稱賀宮庭無任欣說
之至元和十三年正月二十九日

賀雪鎮州表

臣某言伏見四月二十七日德音以王承宗效順著明復其官爵所獻二郡別
置藩垣聖德動天鴻恩及物瑕累咸滌蒸黎永安伏惟歡聖文武皇帝陛下自

承寶位克振皇綱既以四海爲家每念一夫不獲昨因大慶爰降殊私廣宥過之科開自新之路綸言一發神聖潛通遂令迷誤之徒頓釋憂危之慮命胤子以入侍獻名都以效誠臣心既明天網爲解因析四郡別爲一方惟懷永圖盡去前弊大河以北化爲禮樂之鄉率土之濱重見昇平之日臣恪居官次遐守嶺隅不獲稱慶闕庭無任踴躍屏營之至

賀平淄青表

臣某言伏見制旨魏博節度使所奏逆賊李師道并男二人並梟斬訖以二月十六日御宣政殿受賀者聖德玄運兵威神速旬月之內鯨鯢就誅泰嶽既寧登封有日伏惟睿聖文武皇帝陛下有征必克舉意無違天地協神算之期雷霆助成師之氣蠹爾孽豎敢生野心繡斧一臨妖氛自滅皆由聖慈廣被睿略潛通獻俘者盡許生還得地者復令安堵感我仁化激其深衷凡是脅從盡思效節五紀巢穴一朝蕩夷遂使齊魯之鄉復歸仁壽之域捷書既至傳首繼來備文物於明庭告殊勳於清廟百辟陳賀萬方會同此止從戈所以爲武西周

士庶方觀欽至之容東嶽煙雲已望告成之禮臣恪居遠服嘗忝班行慶快之誠倍萬羣品無任踴躍屏營之至元和十四年三月二十四日

夔州謝上表

臣某言伏奉某月日制書授臣使持節都督夔州諸軍事守夔州刺史跪受天詔神魂震驚伏惟文武孝德皇帝陛下垂衣穆清睿鑑旁達三統交泰百神降祥浹於華夷盡致仁壽臣家本儒素業在藝文貞元年中三忝科第德宗皇帝記其姓名知無黨援擢爲御史在臺三載例遷省官權臣奏用分判錢穀竟坐連累貶在遐藩先朝追還方念淹滯又遭讒嫉出牧遠州家禍所鍾沈伏草土禮經有制羸疾僅存甘於畎畝以樂皇化伏遇陛下大明御宇照燭無私念以殘生舉其彝典獲居善部伏感天慈臣卽以今月二日到任上訖破水千里巴山萬重空懷向日之心未有朝天之路無任感恩戀闕之至長慶二年正月五日

賀冊皇太子表

臣某言伏見制書以十二月二十日冊皇太子威禮斯畢德音遐宣萬國以貞庶類咸說伏惟文武孝德皇帝陛下體元立極垂訓御時既闡王猷思安國本前星位定拱宸極以昭彰蒼震氣宣與天地而長久禮先七鬯澤被華夷宗祏有無疆之休生靈懷莫大之慶臣恪居官次遐守巴南不獲稱賀闕庭無任踴躍屏營之至長慶三年正月日

慰國哀表

臣某言上天降禍大行皇帝奄棄萬國奉諱號擗糜潰五情伏惟皇帝陛下孝思至性攀號罔極臣忝守所部不獲陪位兩宮伏增感慕之至謹奉表陳慰以聞長慶四年二月日

賀龍飛表

臣某言伏見詔書正月二十六日皇帝陛下嗣登寶位萬國同歡日月繼明乾坤交泰伏惟皇帝陛下欽承顧命惟懷永圖以大孝奉宗祧以至仁蘇品物洞照寰海統和神人聖祚延長從今無極羣生鼓舞自此大寧臣守遐藩恪居官

次不獲奔馳拜舞稱賀闕庭無任抃躍屏營之至長慶四年二月日

賀皇太子牋

使持節都督夔州刺史劉某叩頭伏惟皇太子殿下祗膺詔冊光啓儲闈展至性於三朝承本枝於百代宗祏永固神人以和四嶽仰維嵩之高百川承少海之潤某限以職守不獲隨例稱慶宮庭無任抃躍之至

賀赦表

臣某言伏見今月三日制書大赦天下者大明初昇萬物咸覩渙汗一發神人以和伏惟皇帝陛下天資睿聖神啓昌期端拱受萬國之朝承顏奉兩宮之慶初嗣大位克揚孝心三光協明和氣來應臣伏讀赦令首於奉園陵盡誠敬親九族蘇兆人次及定章程止進獻已逋責滌夙瑕內照於九重則歸嬪嬙放鷹犬外明於四目則求隱士開直聲柔遠以仁則還其係虜賞延以禮則澤及後昆菲食遵夏禹之規弋綈法漢文之儉墜典咸舉舊章再明昇平之期正在今日發號之始疾於春風殊私所及霑若時雨臣幸逢昌運歷事五朝出守遐藩

僅垂二紀欣承雷雨作解之澤不勝犬馬戀主之誠瞻望帝鄉無任屏營懇悃
之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽章克備慶賜遠行榮冠古
今澤周寰海伏惟皇帝陛下纘承列聖歡奉兩宮太皇太后含飴保和重光疊
慶漢儀盛於長信周祚興於太任方之聖朝彼有慚德臣遠守巴峽不獲稱賀
闕庭無任抃躍屏營之至長慶四年三月日

賀冊皇太后表

臣某言伏見制書以二月二十五日冊立皇太后盛禮畢陳德音遠被一人有
慶萬國同歡伏惟皇太后稟靈作合誕聖表祥徽號極域中之尊慈仁爲天下
之母陛下君臨有國子道無違長樂宮中永獻南山之壽濯龍門上再揚東漢
之風率土臣子不勝歡抃臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州刺史臣自理巴賚不聞善最恩私忽降慶抃失容伏惟皇帝陛下丕承寶祚光闡鴻猷有漢武天人之姿稟周成叡哲之德發言合古舉意通神委用人動植咸說理平之速從古無倫微臣何幸獲覩昌運臣業在詞學蚤歲策名德宗尙文擢爲御史出入中外歷事五朝累承恩光三換符竹在分憂之寄祿秩非輕而素蓄所長效用無日臣聞一物失所前王軫懷今逢聖朝豈患無位臣卽以今月二十六日到所任上訖伏以地在江淮俗參吳楚災旱之後綏撫誠難謹當奉宣皇恩慰彼黎庶久於其道冀使知方伏乞聖慈俯賜照鑒臣遠守藩服不獲拜舞闕庭無任懇悃屏營之至謹差當州軍事衙官章典奉表陳謝以聞長慶四年十月二十六日

賀改元赦表

臣某言伏見今月七日制書大赦天下者帝遊出震聖澤如春神人以和天地交泰伏惟皇帝陛下丕承鴻業光闡叡圖吉日展嚴配之儀告天陳太平之盛

九廟成禮百神降祥鑾輅旋衡風雲改色殊私廣被再弘莫大之恩寶曆惟新更啓無疆之祚兩宮承慶四海永寧率土臣子上千萬壽臣恪居官次不獲稱賀闕庭無任屏營之至謹差當州軍事衙官試慈州吉昌府別將徐倫奉表陳賀以聞寶曆元年二月十六日

夔州論利害表

臣某言伏準元和十二年四月十八日敕敕諸州刺史如有利害可言者不限持節任自上表聞奏者臣伏見貞觀中詔許羣臣各上書言利便馬周時一布衣遂因中郎將常何獻策二十餘事太宗深奇之盡行其言擢周爲御史至龍朔中壁州刺史鄧弘慶進平索看精四字堪爲酒令高宗嘉之亦行其言遷弘慶爲朗州刺史則知苟有所見雖布衣之賤遠守之微亦可施用況臣早受國恩德宗朝忝爲御史逮今歷事四朝頻領藩條當陛下至明之時是微臣竭節之日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜照鑒無任感激屏營之至謹差當州軍事衙官守易州安義

府別將員外置同正員雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下叡哲自天纘成列聖善述先志發揚德音率土人臣不勝慶幸臣虔奉詔旨宣示蒸黎伏以華夏不同土宜各異詳求利病謹具奏聞伏乞聖慈俯賜照鑒臣伏覽國史竊見開元十八年朝集使至京玄宗臨軒親問利害時宣州刺史裴耀卿上便宜事論轉輸甚詳竟不行下至二十一年耀卿爲京兆尹再以前事奏論方見允納比及三年漕運七百萬石省脚三十餘萬貫當耀卿前不見納必有人非之及後數年方展其效臣僻守遠郡敢望言行祇奉詔書或冀萬一伏惟明主擇之無任懇悃屏營之至長慶四年五月十四日